

杭州图书馆

杭州圖書館

明詩綜卷四十八

小長蘆 朱彝尊 錄

安宜 張易忬 緝評

徐獻忠 一首

獻忠字伯臣松江華亭人嘉靖乙酉舉人知奉

化縣及卒友人私謚曰貞憲先生有長谷集

靜志居詩話長谷以作者自期待論謂詩人之作代出意匠以增前人之能旨哉言也其比六朝齊偶品唐詩原樂府皆有功後學惜其書不

盛行詩亦冲澹無累句特少警拔耳

俞氏水樓

故人江樓月照見千里心遊子未言歸清光被滿襟西

陵隱簷際南湖澄夕陰持杯向木末捲幔對遙岑悵然

不能去徒令江水深

明詩綜卷四十八

一

沈 燭 一首

燭字世明一字伯遠嘉善人嘉靖乙酉舉人有

石籬遺藁

送顧梧石之衡州

瀟江路轉千峰碧冉冉蒼雲拂樹低此去臨風憶回首

月明江上鷓鴣啼

顧 聞 二首

聞字行之吳縣人嘉靖戊子舉人自號九峻山

岳東伯云九峻才華瑋麗鋪敘豐長究其所歸靡不有自至於染翰人稱其能並美者矣

折楊柳

芳艸接金隄垂楊綠更齊夕絮離天遠春絲別霧迷曲
中青鏡改愁畔紫騮嘶紅樓歎少婦腸斷玉關西

夜泊崔鎮聞笛

雲落清河夜天橫片月涼江樓莫吹笛明日是山陽

孫宜 十首

宜字仲可華容人嘉靖戊子舉人有洞庭漁人

集

顧玄言云漁人新聲奇調在李唐二孟之間河嶽隱淪之賈秀者
錢受之云洞庭漁人詩多至三千八百餘首王元美評云華容
孫宜得杜肉余觀其詩擬字句了無意

味求杜之片鱗半瓜不可得而况肉乎

詩話洞庭漁人胡氏詩數稱其學杜然實源於大李故論詩絕句云我
愛風流太白囊萬言珠玉在揮毫特其運筆癡重斯與謫仙人不類耳
其於空同大復少谷太初迪功西原皆其所
取法滔滔莽莽十筆不休亦楚產之傑出者

十三夜月

明詩綜卷四十一

二

良晤旣匪易佳節亦復過今夕非昨夕光景忽已多霏
霏失玄霧濫濫增金波昔眇猶室隅茲升眇庭柯當扉
萬象啓側戶三星羅蕭爽候愈寂沉冥夜如何興言悅
至賞眷此成清歌

十四夜月

循環廼常度盈昃亦至理幾望已在茲持盈有深旨天
運恒自然人事安足恃未滿溢漸形欲盛衰伊始倚伏
本貞機損益妙良軌志以道自虛情緣欲斯侈守義焉
所窮法乾信云美

送周氏

黃河逾東逝白日淹西沉人生不滿百奈此世慮侵貧

賤豈得渝富貴安可欽浮榮竟香漠要路恒崎嶇邵侯
悅瓜田陶令謝華簪達觀信有及古道良足箴得喪匪
人爲憂樂由我心願言返初服聆我山水音

菱港

結軫倦久疴嚴裝理前遊山行稍云疲水宿良所由弭
權臨別浦揚舲逝安流波迴路曲折雲霽天沉浮霜荻
響近渚風篠鳴長洲沙翔去來鷺岸並連拳鷗澤蘭晚
漸垂江蒞秋始柔遵嶼乍離合凌颺屢優游擊楫情已
乖乘桴與將侔即此締暹盟抽詞贈同舟

行視別業禾稼作

狗祿返塵軌臥疴遂幽垆爲圃竟不習學稼鮮所明薄

明詩錄卷四八

三

田委僮僕嬾性謝經營春陽始云改夏序亦以征輟翰
越城棲振衣事郊行旣暢景物麗復感禾黍盈雲葉被
吟秀風花覆阡平修渠濯細流佳實播初馨堅好類周
穉耗蠹殊魯螟利婦足遺穗築塲喜新晴澤黍我私及
秋荷今歲成麤糲甘自嘗飽煖奚更營且免洛陽歎聊
結杜曲盟

王生入山謝事戲簡

疾風吹雲暗江縣東城之雷北城電城中一雨絕可憐
十日不見王生面昨當折簡傳深意咫尺山城爾須至
楊雄艸玄亦避人侯芭載酒曾多事

秋日歌

二首

秋風忽吹洞庭艸萬壑千崖覺秋早江邊白石迴波濤
湖上蒼雲亂昏曉少年日月易搖落即日繁華已枯槁
人事天時合併催風塵何必長安道

秋風浙浙吹茅屋東流之水西日速地連南極北極雲
葉落千山萬山水江上漁人罷釣歸臨風拋擲綠荷衣
黃塵碧海眞漂泊白石滄波誰是非

同諸友遊郭曲

地勝因湖得堂幽對野開晚風吹笛起秋水抱城迴溪
友留魚去鄰翁送酒來爲言九日近引客試登臺

十三夜月東謝子

今夕江樓月能添昨夜明苑雲寒自斂城角霽尤清露

明詩錄卷四十八

四

警花間雀風微樹杪螢百壺高興在端坐待君傾

陳

津五首

津字道通長洲人嘉靖戊子舉人仕至兵部職
方郎中有莪齋集

詠史

貧賤希富貴富貴履危機赫赫丹徒子當樞思布衣五
鼎有覆餗一瓢堪樂飢可知東門犬不若西山薇火烈
飛蛾焦泉深鯉魚肥胡爲即顛越而不鑒於微不見成
連子千載揚音徽

怨詞

明妃絕世姿少長君王側一忤丹青人咫尺成離隔何

况窮居士欲望君王識

石山驛

四野動力作荷鉏紛出村開塍望新沃喜見前山昏風
氣藹林杪春風搖艸根丘中有來信燕子入衡門

螢

分將光自照肯擬暗中投寂歷依書幌分明點客舟露
涼深映竹風定直衝樓不恨飄零晚終隨大火流

陸冰修
云五六

磬清

燕子磯

燕子何年集釣磯春氣不見舊烏衣空餘芳艸迷前浦
長自寒潮送落暉刺眼野桃臨岸發多情山鳥傍人飛

明詩綜卷四六

五

獨慚白髮紅塵客此日披襟對翠微

鄧遷一首

遷閩縣人嘉靖戊子舉人官嘉興通判

感秋

白露下亭皋涼風吹綺陌一夕芙蓉花紅芳變瑤碧

包桐一首

桐字子同號同谷鄞縣人嘉靖戊子舉人官知

縣

送屠秋官國望復任留都

寒江渺渺煙霞開揚舸西指鳳凰臺大夫十年不得調
風塵千里胡為哉銜杯欲別別最苦拔劍當歌歌莫哀

璧水貫城當咫尺相逢還許坐莓苔

黃省曾一首

省曾字勉之吳縣人嘉靖辛卯舉人有五岳山

人集

皇甫子循云勉之思劇沉語罕仍襲宿構非工食時為敏徐紹卿云勉之才藻富捷篤尚深華徐子云勉之詩宗六

朝如空江月明獨鶴夜警王元美云黃勉之如假山池雖爾華整大費人力穆敬甫云山人從空同遊刻意為詩遂成一家岳東伯云五岳遊覽之餘極軼靡儂剪剔結

繡咀嚼瓊英每篇輟筆然驚目

詩話勉之詩品太庸沙磧盈前無金可揀當時從遊李何漫無師資之益反不若方山汾溪二賈人子尚有秀句可采也

江南曲

旖旎綠楊樓儂傍秦淮住朝朝見潮生暮暮見潮去

史元中一首

元中號鹿泉鄞縣人嘉靖辛卯舉人魚臺知縣

明詩綜卷四十八

六

有青蓮集

詩話鹿泉知魚臺縣事值歲大侵盜賊起有簡瑞者為盜魁善蓮稍馳馬出沒官道鹿泉以計縛之簡臥庭下瞪目曰吾左手持稍右短兵橫行千里聞今為書生掩取天也公笑曰汝輕書生耶即起著短衣持其所用稍運之左右迴旋如舞匹練忽稍斷為三擲示簡曰汝稍豈足用耶簡叩頭稱死罪乃繫之獄至冬月將論決簡求見公曰身亦先一東男子不敢負公乞假十日一生別老母公即縱之去眾皆懼及期先上一簡就獄離魚臺三十里為獨山大盜劉儀久嘯聚其中有眾數千開府軍公統議進剿以公為前鋒旣擇日陳兵禱祭畢公獨山有謀者在當三矢中此竿步外公手挾矢誓曰某以書生任將兵若一舉滅賊震地是日公即察得譯者三人釋其縛賜以美酒食笑謂曰汝來觀吾射耶謀者鼓栗盡吐賊虛實及所入獨山徑道公立提兵襲其寨擒劉儀還曾公大喜方論薦公會曾公還制三邊尋為相萬所害赴市鹿泉歎曰事尚可為耶即日挂冠歸里時年四十二家居復四十年守冷思一造見不可得老益質惟費文以自給云

秋思

世事吟邊改流光醉裏過歲收頻下下公賦益多多有

暇窮漁獵無憂隱薜蘿康衢終見及擊壤續堯歌

林垠 一首

垠字天宇閩縣人嘉靖辛卯舉人選授桂陽知州遷撫州同知終戶部員外郎有野橋集

拒馬河作

拒馬河邊驛路長蜚狐口外又斜陽春光已過六十日
不見花枝空斷腸

唐 鈇 一首

鈇字君錫蘭溪人嘉靖辛卯舉人任楊州府同知陞楚府左長史

江行

明詩綜卷四十一

七

客計方歸越征橈更背吳風螢臨水亂江月向人孤洲
已過迷子山行及望夫可憐清夜色強半在長途

黃 中 三首

中字文卿處州人 藟臺法鑿錄作遂安人浙士登科考同 嘉靖辛卯舉人

授鉛山知縣擢貴州道御史出為山東按察副

使有南窗紀竊集

田叔禾云括蒼詩派得自郁離子自鄒離子歿作者李時遠云副使為詩不泥法度不主

當作者 故常冲融渾化意境兩忘識者謂其衆體皆備

長相思 二首

妾夢一處所積雪滿空山覺來向人語道是玉門關
萬里傳郎信開緘喜欲狂報得郎身健遲歸亦不妨

久雨

河東早秋風已涼况乃陰雨難禁當客子衝泥出門望
蓬蒿滿徑如人長翻飛紫燕不妨濕婀娜黃花今漸香
歸來獨酌對山色圓笠依然戴石郎

強

仕
三首

仕字甫登無錫人嘉靖辛卯舉人選授江西廣
昌知縣遷知德州有考槃寤歌綺滕集

咏向長

子平謝累辟雅志在隱居乏食或有饋取足反其餘讀
易深自悟人世等蓬廬謂貧富不及謂賤貴不如勅言
婚嫁畢家事無關余同好有禽生肆意相與娛五嶽游
躅徧高風映簡書

明詩餘卷四十八

八

咏王霸

儒仲有清節始亦赴徵命造廷抗高辭不肯臣萬乘歸
來事躬耕蓬藿掩門逕翩翩故人子相過容服盛一念
兒曹羞容去臥不應賴有賢婦言不失初守正嘉遯遂
終身清輝兩相映

咏梁鴻

伯鸞古賢人乃在杵臼間夫婦共守志逃名入深山淒
涼五噫歌東出舜帝闈齊魯復荆吳長往遂不還為傭
豈無勞顧已少外患終葬烈士旁高風邈難攀

劉成穆
一首

成穆一名嘉壽字玄倩又字文孫崇慶人嘉靖

辛卯舉人有劉玄倩集

朱來器云玄倩詩文初不經意即席揮灑頗有佳者

詩話李廉遇漢武帝陵詩云歲暮霜殘過漢都武皇陵墓真荒蕪不將玉匣藏天馬猶使金燈照野狐賦客詞園清露盡仙翁丹壑白雲孤千年唯有秋風曲渭水長流啼夜鳥揚用修見而甚愛之然按其字句尚欠帖妥故置不錄

城南送友

送汝歸南國燕山正早秋獨傷千里別同憶五陵游漢殿相如賦吳江范蠡舟相思同易水日夜自悠悠

高應冕

四首

應冕字文中仁和嘉靖甲午舉人官光州知

州有光州詩選

顯玄言云文中材致清瞻警調造拔平平寫出亦自沉淨

江上行

白日江上沒江雲滿滄洲鷗鳥各隨群煙波何悠悠還

明詩歸卷六八

九

將不繫心送君千里舟相思不相見極目令人愁

同張玄洲胡圓洲王曉山張元洲項芳溪江樓觀

潮分韻

江聲秋益壯江艸秋還歇夫差自亡吳子胥何怒越盤盤江上山盈盈江頭月此景亘千古不逐浮雲沒

江村晚眺

荒村沉夕照煙樹幾人家野渡迎潮急寒山帶月斜漁歸無遠市鴈下有平沙寂寂秋江晚芙蓉自落花

渡湘江有感

扁舟復何去五月下瀟湘遙望蒼梧迥還憐楚水長暮潮下野渡遠樹帶殘陽渺渺雲山外蒼茫隔故鄉

陳芹 三首

芹字子野系出交南國王永樂中避黎氏之亂
來奔遂家南京中嘉靖甲午舉人六試禮部不
第謁選知奉新縣調簡得寧鄉之官九十日謝

病歸結青溪社有陳子野集 錢受之云子野才情警敏
醉墨寫竹枝欹斜盡致文

徵仲戒門下士往南京慎勿画竹披中有人也少嘗夢入深山石梁跨
道瀑布灑空洞中二老僧跣坐周繞木蘭以防虎夢去久矣自是恍然省悟專精內典
夢中木蘭猶在問之土人云老僧化去久矣自是恍然省悟專精內典
作和寒山子詩別業近新林浦是謝元暉題詩處又於桃李淮清之間
起邀留閨延一時勝流結青溪社每月流風未艾承平盛事至今人豔
文酒醜味之席於斯為盛相延五十年流風未艾承平盛事至今人豔
稱之長年布兒

猶能指點其處
詩話虞山錢氏芹金陵社集詩云海宇承平陪京佳麗仕宦者跨為仙
都游說者指為樂土弘正之間顧華玉王欽佩以文章立埤陳大豫徐
子仁以詞曲擅場江山妍淑士女清華才俊歛聲風流弘長嘉靖中年
朱子价何元朗為窩公金在衛感仲交為地主皇甫子循黃淳父之流

明詩綜卷四十八

為旅人相與授簡分題徵歌選勝秦淮一曲煙水鏡其風華桃李諸姬
梅柳滋其妍翠此金陵之初盛也萬曆初年陳寧柳芹解組石城卜居
苔步置驛邀賓復修青溪之社是在衛仲交以舊老而強盟幼于百
韻以勝流而中止歿後軒車紛還唱和頻煩雜詞章未闕而盤游
無已太康此金陵之再盛也其後二十餘年間人曹學任能始廻翔棘
寺游宴冶城朋過從名勝絕此絕精神則賦音叔陳德遠為着目布衣
則吳非熊吳允兆柳陳文盛太古為領袖臺城懷古爰為憑乎之篇新
亭送客亦有傷離之作筆墨橫飛萬狀騰涌此金陵之極盛也戊子中秋
秋余以銀瑤障日采詩舊京得金陵社集詩一編蓋曹門客所撰集
也差夫日中月滿物換星移舟楫夜趨飲獵旦改白門有鳥無樹枝之
可統華表歸鶴悵城郭之移非撰文懷人吁其悲矣謂我何求亦無嘗
焉覽其文者謂淋漓盡致感莫今昔之感具於是矣然錢氏攻之未得
其詳青溪社集倡自隆慶辛未而非萬曆初年也未乘器停雲小志云
青溪自後湖分流與秦淮合當桃李淮清之間有激笛步者曹玉蕊之
邀桓伊吹笛處也陳明府芹即其地為閣焉俯瞰溪流頗有幽致歲辛
未費松軍懋謙約余為詩會其上於是地主則明府次則唐太學資賢
姚典當湖胡民部也祥華廣文復初鍾參軍黃松軍孫棟學歐金山人
甫盛賓士時素任參軍夢樵先後游而未入會者則張太學獻萬金山
人鸞黃山人孔昭梅文學鼎祚莫山人公達王山人寅黃進士雲龍夏
山人曰瑚程亳州振東陳將軍經翰汪山人顯節汪文學道貫道會沈
太史懋學程文學應魁周文學時復蔡晉復為賓會則吳文學于玉璣
廣文學禮莫貢士是龍鄒太文學應魁張文學文柱每月為集遇宴命題

即席分韻同心投分樂志志形聞事校評期臻雅道前會錄詩若干刻之命曰青溪社稿許石城先生敘其首續會錄詩若干吳瑞穀序之會全領袖郡符任參軍入興都稿遂散後方民部沈荃山人之芳入焉余馳書社中期稍收輯無何胡民部費參軍以註設調黃參軍以領郡行已方戶部亦因事出盛會不常良朋星散回首江東雲樹在望秦淮煙月黯爾銷魂因記舊游略次其姓氏篇什如左按此青溪社集之本末始備錢氏止觀曹氏門客撰本而未見季器小志故也

折欄會和周銀臺韻

新歲詩家集深更興未闌共憐今夜月仍似去年看社主歡扳轄車徒怨折欄綵梅紅對酒忘却外邊寒

秦淮煙月

秦淮煙暝水長流明月空懸萬古愁春去秋來風景別鳴箏夜夜酒家樓

聞笛有懷朱比部

空林寂寞雨絲絲拚得梅花未滿枝正值鄰家夜吹笛倚闌無限故人思

王 鑛 二首

鑛字公范閩縣人嘉靖甲午舉人官思明府同

知有冶山拙橐

送大行謝驛梅使琉球

使節分星象仙舟捧御函絲綸宣海嶽天地極東南服荷殊宣賜才推絕域堪遠人胥樂附異俗乃能諳父老相如檄詩書陸賈談徵宇宵踰十館穀日過三牛馬風何隔金銀氣不貪兩階遐格舜九扈乍聞鄭專對名非忝周咨迹豈慚歸航應載石赴闕及傳柑國體從茲振

兵威不自戡梅花洋信近延佇慰朋簪

青魚灘

青魚灘上野人家曲徑疎籬長物華漠漠午煙吹不散
鷓鴣飛出木棉花

薛

欽二首

欽字寅甫懷安人嘉靖甲午舉人太平儒學教諭有東山集

句容道中望茅山

詩話薛君詩頗清越近於皆山樵者曹能始序徐惟和詩云聞自林臆部後百餘年而得鄭考功又數十年而得薛博士其推重若是

翠嶂盤江句遙天紫翠分風塵應不到鸞鶴自為羣
曉徑連青靄秋山徧白雲可憐句曲望不見華陽君

雞鳴寺

明詩綜卷四十八

三

古寺浮仙嶂層甍近帝家洞香流石乳僧午飯胡麻金
剝盤飛鶴丹池聚浴鴉俄聞孤磬發蕭颯滿煙霞

郁蘭一首

蘭字文芳秀水人嘉靖甲午舉人官南京刑部主事有比部橐

詩話嘉靖倭亂胡總制宗憲有捍患功及被逮繫陽川時知績溪縣事力覆護之至以去就爭願上印綬始得免羅織可謂長者今鄉曲之士如其名者寡矣矧詩乎

讀五代史

天地沉冥際山河戰伐中可憐長樂老只是愛三公

吳節一首

節字子甘江陰人嘉靖甲午舉人任江西新昌知縣

登仙阜亭

仙阜孤亭敞憑高發興新風帆斜入浦雲樹曲通津丹井迷芳艸清池覆綠蘋月明歸去近涼影忽隨人

陳紹文 一首

紹文南海人嘉靖丁酉舉人官通判

幾日南巡詔旋看下九霄五花邊將馬七葉禁臣貂
子馳金輅神人駕石橋康衢應有頌誰爲采風謠

吳旦 一首

旦字而待南海人嘉靖丁酉舉人謁選爲知州

有蘭皋集

明詩錄卷四十一
詩話蘭皋南園後五先生之一也惜其集不傳

秋夕城闈納涼

同游冠蓋晚相招澤國山川正次寥官閣迥臨秦代壘
女牆斜帶越江潮流螢艸細風先動繞鵲枝長露易飄
多少高樓人不寐碧天涼月夜吹簫

蔡宗堯 一首

宗堯臨海人自號東郭子嘉靖丁酉舉人選授
松陵教諭有龜陵集

麗情曲

曲房過雨蕙徑空綠雲藹藹懷春風欹枕牙床睡初醒

胭脂汗濕羅衣紅鴛鴦牽繡絲未歇流蘇夜煖斜明月
珠簾半卷春日高海棠飛起雙蝴蝶

鍾廣漢云
八又遺響

方效一首

效字去病桐城人嘉靖丁酉舉人有石洲集

歸途

大龍之嶺高插天石塘湖邊秋可憐稻花菊花裊寒露
遠壑近壑屯晴煙江聲激壯自今古峽徑縈紆還歲年
悠然獨馬渡河去日暮滄洲停客船

郭文涓二首

文涓字穉源古田人嘉靖丁酉舉人官保寧同

知有亭帚集

明詩錄卷四十一

十四

遊西山

緬維京國遊夙憶西山勝前期戒朋儕昧爽理征鐙連
鑣出都門散轡遵郊徑尺猶望晴巒迢遞陟煙磴蒼茫
紫翠分參差金碧映雲際鬱層薨風中發孤磬山光足
怡愉池色湛清澄覺花粲奇馨慧艸紛延巨梵影空中
懸經聲榻前聽行恐苔痕穿嘯聞谷響應翠巘屢攀躋
朱闌恒眺凭取適情易酬息機意初稱登臨愜賞懷攬
結動幽興聊茲却喧囂庶以慰蹭蹬

夜懷

疎燈孤館寂落木萬山空夜色誰家月秋聲何樹風鄉
園歸鴈外身世轉蓬中祇益離羣意淒然思不窮

劉熠一首

熠字元麗號東沙海鹽人嘉靖庚子舉人官監察御史有同春堂遺藁

山中風雨

春來風雨倍淒淒咫尺雲峰萬木迷竈下濕煙離突起
庭前幽艸上塔齊夢來旅况殊鄉國聽去江城盡鼓鞀
縱擬單車待明發子規聲已遍前溪

方輿邦

一首

輿邦字懋翼莆田人嘉靖庚子舉人官至廣西
參議有喬村集

得子相書

明詩綜卷四十一

五

尺素中宵慰索居美人南國意何如江淮殺氣昏牛斗
豺虎烽煙感羽書天入蒹葭孤鴈盡秋來風雨五陵疎
朱門鳴瑟誰知已莫漫逢人賦子虛

許邦才

五首

邦才字殿卿歷城人嘉靖癸卯舉省試第一任

永寧知州遷德府長史有海右梁園二集

魯詩藩中立云空

石詩做于鱗而氣格不逮然于鱗詩多客氣而空石溫厚或過之謝茂秦云殿卿軒軒豪舉傍若無人宋轅文云于鱗亟稱殿卿其梁園

集殊不稱絕

句差快意

詩語殿卿如銳頭年少騁獵平原耳後生風鼻頭出火長歌有云長卿氣殊倫令張正言為之不過此也王元美贈詩云是時歷下李攀龍往往道汝文章伯乃危言評詩竟不之及又吏之四十子之列取舍似未也

寄懷元美

鴻鴈驚秋海上還，片雲孤月蘄門關。如何昨夜西窗夢，不道千山與萬山。

送高都護入賀

將軍白馬插雕弧，自傍屬車誇射鳥。陛下聖明三萬歲，微臣直至執金吾。

送謝中丞歸射洪二首

六月江干冰雪涼，射洪春酒鬱金香。自從筇竹通西夏，漢使年年出夜郎。
巫峽江陵一水分，猿聲兩岸夜成羣。遙知月下孤臣淚，才過三聲不可聞。

留別劉公

明詩綜卷四丈

十六

秋風長缺幸生還，明日孤臣入楚關。莫道三年人萬里，天涯消得幾重山。

韓詩一首

詩字承志長洲人，嘉靖癸卯舉人。知永豐縣，遷雷州府同知。有勗齋詩集。

小齋即事

小齋寂歷似山居，池上逍遙與世疎。盡日不通門客刺，經春嬾報故人書。梢簷細竹含風響，繞榻輕雲過水虛。願得郡中無一事，十年不調更何如。

戎來賓一首

來賓先名國振字孔塘鄞縣人嘉靖癸卯舉人
榜後更今名官南昌府通判

郊居即事

作吏才偏拙爲園意頗深風塵元畏路山水是知音徑
曲叢篁密堂虛澹月侵平生甘放浪自合蚤抽簪

梁柱臣

一首

柱臣字彥國廣州順德人嘉靖丙午舉人官灤
州知州入爲刑部員外有梁彥國存彙

寄懷蘇雲谷逸士

吾鄉隱君子質素古人風性豈琴書癖身將猿鶴同捲
簾山閣暮策杖海雲空一別麻源谷相思挂樹叢

明詩歸卷四十八

七

陳所有

一首

所有字彥冲莆田人嘉靖丙午舉人合浦知縣
艸堂

艸堂在西林露頂避溽暑客來剝啄聲葛巾不知處

孫樓

一首

樓字子虛嘗熟人嘉靖丙午舉人湖州推官有
百川集

郊西詩

上苑春偏麗西郊更可憐輕塵花半妥斜陌柳初眠綠
樹鶯聲外青山馬首前夕陽南北淀彷彿太湖田

邵圭潔

一首

圭潔字伯如一字茂齋嘗熟人嘉靖己酉舉人
有北虞集

蘇臺竹枝詞

魚尾晴霞片片明鴨頭新水半塘生平川蕩槳一十里
深巷賣花三五聲

黃尚質

二首

尚質號

餘姚人嘉靖己酉舉人知息縣事
遷知景州有青園錄

再過半山堂

春風重過半山堂依舊千峰入坐蒼更有好花明後院
旋添新竹蔭虛廊画圖想像摹雲谷詩句模糊認雨墻

明詩綜卷四八

六

却怪山禽似相識向余啼上臥龍岡

采茶女

結束烏椎髻攜筐去采茶歸逢鄰女笑也插杜鵑花

葉春及

八首

春及字化甫歸善人嘉靖壬子舉人選授福清

儒學教諭陞惠安知縣遷興國知州轉鄖陽同

知召為戶部郎中有網齋集

詩話歐陽永叔日本刀歌云徐福行時書未焚逸書百篇今尚存全嚴
不許傳中國舉世無人識古文永叔雖有是言亦詩人托興而已故葉
少蘊馬翔仲均疑之鄭麟趾高麗史宣宗八年五月李資義還自宋奏
云帝聞吾國書籍多好本命館伴書所求書目錄授之且曰雖有卷第
不足者亦須傳寫附求目錄首開百篇尚書而高麗未之有也先是咸
平中日本僧奝然以鄭康成注孝經來獻不言有尚書王揮中堂事紀
載中統二年高麗世子植來朝宴於中書省問曰傳聞汝邦有古文尚
書答曰與中國書不殊然則百篇尚書高麗且無之况日本乎萬曆初

綱齋在卽署有命遣使臣封侯綱齋上言請多方索之以歸未免近於迂矣綱齋令惠安幾與姑臧萊蕪比黎有緇衣按郡經縣治驕從過歲將止宿馮綱齋前曰日未軒惠安小縣豈容駐脚乎強之去強項甚矣及解組歸隱居羅浮之石洞吟詠自適雖以講學聞詩宗杜陵不墮程鄧門

飲陳吳御宅卽席賦得帝宇

黃公避秦皇子陵傲漢帝萬乘彼不榮五斗吾何利邇來脫桎梏麴蘖聊避世田父尚不辭况乃夙同志高堂敞華筵上客縱橫至日暮飲未休舍坐還席地屢舞倩人扶懼言答賓戲因思劉參軍荷鍤有深意

飛雲頂

峰到飛雲絕晴看赤日沉露凝霜鬢白龍起二儀深積氣連吳楚啼猿自古今天門知不遠乘興欲登臨

明詩綜卷四十八

尤

小砢石臺

倚劔孤城暮登臨萬壑秋潮平沙岸失月落島煙浮白鹿通夸國黃雲滿戍樓南征斷消息橫吹不勝愁

訪詹昶亭先生巢雲書院兼呈社中諸友

二首

巢雲高不極飛閣倚雲開樹杪滄溟盡尊前紫翠來江湖雙涕淚天地此樓臺縱有終焉計能忘國士才惆悵出門去徘徊流水間菊花深復泛桂樹晚重攀返照孤城斂寒雲大壑還明朝羈物役清夢到柴關

白雲洞口號

二首

洞晚雲隨入巖秋雨自飛莫愁霑野席猶得浣塵衣歲月吾將老煙霞興不違昔年招隱處叢桂可同歸

古洞何年闢長留宿白雲江山千里盡風雨半天聞芝
朮堪時往壺觴到夜分依依乘月去猿鶴惜離羣

初春滕方伯支學憲招飲藥洲藥洲南漢離宮有

池今名白蓮池畔有九曜石

留客平原飲賢哉二大夫致身霄漢近傾蓋古今無翼
北空良驥關西得舊儒偶然山澤叟今夕一尊俱

張鳴鳳 一首

鳴鳳字羽王豐城人嘉靖壬子舉人選授府通

判

留別黃門周公

清時落拓媿無能何事高人獨見稱朝議遽寬重謹吏

明詩綜卷四六

十

聖恩因借六安丞雲山曙色催行李秋渚離心醉采菱
夢裏亦知雙闕路幾回深夜悵殘燈

陳 師 一首

師字思貞錢塘人嘉靖壬子舉人有復生子橐

潞河舟中作

夾岸垂楊青可憐出門仍是葛衣天鄉書不到東吳鴈
客夢重尋潞水船季子貂裘重那敝王喬鳧舄幾時旋
年來作客渾南北囊底曾無貲酒錢

吳景明 一首

景明字復陽休寧人嘉靖壬子舉人知州有西

洲集

赴西州任道中即事

灘險飛流急林深毒霧遮溪行朝避蜮山宿夜妨蛇屋
市枕椰樹籬編茉莉花從知邊徼地風土異中華

姚光虞

一首

光虞南海人嘉靖乙卯舉人官至知府

送周國雍守順慶

使君千騎擁朱幡此去誰云蜀道難列郡分符虞岳牧
前驅負弩漢衣冠湓城月色揚舲渡巫峽濤聲倚劔看
行矣外臺今不薄循良卿相滿長安

鄧元錫

六首

元錫字汝極建昌新城人嘉靖乙卯舉人徵授

明詩綜卷四十一

主

翰林院待詔學者私謚文統先生有潛學棗

擬古

人皆願延年延年欲奚爲一夕復一朝忽與百歲期誰
能繫西日長挂扶桑枝羣流赴巨壑寧復有還時劉安
將雞犬八公徒愕貽秦皇與漢武但爲方士嗤

雜言別傳陳二友

義娥無停轂青陽忽朱明柔條奮翹柯原隰何青青往
者日以徂來者日以榮嗟余至寡劣晞聖徒有營邁往
信不力逾覺時序傾我身所以立豈不恃友生奈何同
心侶中道各有程戚戚增紆思薄言寄深情

古詩送王子仁

噓物寧非風風勁物乃戕駕車寧非馬馬疾車以僵百
獸伏駒虞衆禽景鸞鳳豈無鷹隼姿搏鷲難爲良

別江子

良農程歲功豐凶非所諳良賈經儲積利鈍皆所甘曾
以水旱故棄捐任與負曾以貿易薄棄捐絲與布十年
經世業料理亦有素奈何乘軒輶中遠思改驚人生各
有職治職各以勤永誦蟋蟀篇愴然念先民

初夏登眺天峰

江城開宿雨孤嶠共躋攀龍氣留蒼壁鶯聲響碧灣危
峰斜帶郭幽徑曲盤山不淺東林興迢遙未忍還

途中雜詩

明詩綜卷四十一

十一

河水走平土郡邑何偏側君莫問河防河防無上策

周式南一首

式南字仲翰吳江人嘉靖戊午舉人以孫宗建

貴贈太僕寺卿

萬松巖

爲愛山幽選勝來城南絕巘翠屏開澗邊黃葉自秋色
門外落花空古臺松影半分禪榻靜潮聲一道海門回
聖朝欣覩平夷頌欲賦長揚媿不才

劉魁一首

魁字煥吾泰和人由舉人選授寶慶通判移知
鈞州遷潮州府同知入爲工部員外郎諫徙雷

壇廷杖繫詔獄者再以宮禁火赦還有晴川集

詩話水陵好道詔從雷壇於禁中曰雷靈洪應之殺有壇有城有轟雷軒有嘯風噬靈雷雨靈之室有清一齋有寶洞門有靈安精崇輔國演妙之堂有八聖居有馭仙次各懸以額又別建凝道雷斯順之日常御之其始作也晴川疏請停止帝怒于杖繫獄與楊伯脩周顛之講學因國中是年八月西苑神降于此請有三臣乃得釋俄復連繫明年宮禁火放還晴川陽明弟子也郡人鄒公元標合三人詩刊之題曰三忠

過德州次訥溪韻寄斛山

繞過滄州又德州綠楊堤岸菊花秋未論秦楚萬餘里
且共風波一葉舟農圃漁樵俱是侶江湖廊廟敢忘憂
獨憐胥脚差還健有約同登華岳遊

張燾四首

燾字水波南昌人由舉人仕至府同知有崇古

明詩綜卷四十八

三

堂豪

先鋒樓

噫唳哉延城之山高兮天際頭况此城上更架百尺先
鋒樓登樓一望覽無際但見萬里蜃氣滾滾直與蒼天
浮三峰九溪不暇數時有倭雲刺日出沒亂我雙吟眸
憶昔使君提兵駐此地雄據八郡當襟喉生靈百萬賴
保障勞集不讓高密侯爾來兵力日綿薄肉食誰為天
王謀向來鄰郊有小警遂使五嶺欲撼杉關愁噫唳哉
粵山如昨粵水流壯士一去天悠悠東南徭獠尚可語
西北烽煙誠足憂去年胡馬下井陘遂使烽火通幽州
令人拊髀歎不已投筆每為班生羞安得使君溪前仗

劍起直走塞下一鼓甲士皆貔貅
漠南河西羌種盡擊滅從此玉門遣戍空防秋

秋思二首

本朝宣大屹秦關北轉河戎部落間
魏闕頻看優詔下玉門誰唱凱歌還
黃沙鼓角野狐嶺白日羊駝天馬山
節鉞不來揚石遠蚤秋烽火照愁顏
中原舊服緣河套百戰翻成縮內邊
空使健兒遺白骨不聞中帥給青錢
六羸徑入榆林寨衆鴿橫飛好水川
安得征西班節使坐收氐海淨狼煙

康山忠臣廟

高王卷甲南征日掃蕩亡陳向北洲
焚炬未應誇勝算

明詩餘卷四十一

五

覆巢原已畫先籌江東父老空憐楚
垓下山河盡屬劉寂寞康山湖上廟
至今煙雨不堪秋

李 陰一首

陰字襲美內鄉人官刑部主事有五遊集

雪霽登雲門山

晴雲落澗春水鳴好風吹人衣袂輕
有山如此不一醉啼鳥可憐空數聲
碧石崔嵬跨絕壑白雲爛熳連孤城
楚客興來每獨往浩歌不減昇天行

張邦伊一首

邦伊字孺覺鄆縣人以父時徹廢仕至陝西苑

馬少卿

沈嘉則有三楚之遊席上得分字

春城斗酒惜離羣
把袂高歌到夕曛
地入衡廬三楚盡
天迴襄漢九江分
停舟夜聽湘靈瑟
倚閣朝寒鄂渚雲
知爾尚平家累淺
逢人勝事好相聞

仲春龍

一首

春龍字原仁秀水人以太學生選授文淵閣中書舍人有九山樵子集

少年行

鏤金鞍子百花裝
三尺流虹飲血光
白日報仇官市上
青春調笑酒壚傍

潘

緯

一首

明詩綜卷四六

五

緯字仲文一字象安歙縣人入貲爲武英殿中

書有養疴遊淮園居諸集

王仲房云仲文年少攻詩不甘嘗調雖羽翼方翔而風力厚負

閩門尋周公瑕王和仲所居不得

閩門九陌通車馬
往來逢入郭尋舊識
望閩迷舊踪
空停秋江棹
漫聽寒山鐘
相隔城闌裏
煙雲凡幾重

項元洪

一首

元洪字子瞻秀水人光祿署丞有少岳山人集

皇甫子循云子瞻古遠冲逸五言典雅七言清婉

同陳白陽登閣

月宇臨清桂星筵拂絳河
已投車轄飲兼倒接羅
歌砧杵催秋急風煙向晚多
春波門外路乘興數經過

周錫三首

錫字子純太倉人嘉靖中以薦授潮州府通判
有南游東山蒹葭得已諸集

詩話子純下筆不休閒有合作相傳攝潮陽縣印巨寇楊三槐林大帥率黨千人駕三十艘壓境警報至子純徐曰鼠輩爾胡能為眾皆懼子純挾弓矢上馬引滿射三發三中的桴鼓應之擊走三槐擒大帥以歸縣境以寧洵豪士也

海豐道中

長夏苦于役炎風吹鼓鼙山深榕子落雨急鷓鴣啼野
渡從流下斜陽在竹西極知行路險愁殺嶺雲低

茅屋

茅屋自成趣况丁離亂中敲冰兩孺子曝背一衰翁客
至村醪薄樵歸樹葉空三江十萬戶安樂幾人同

明詩綜卷四十一

善

吳門夜泊

谷口揚帆風正急野亭雲木雨霏霏晚來城郭維舟穩
老去湖山見面稀十里煙光開疊嶂兩崖樓閣帶斜暉
夜深欲傍寒山寺依舊鐘聲落翠微

吳承恩七首

承恩字汝忠淮安山陽人長興縣丞有射陽先

生存藁

陳玉叔云汝忠緣情體物其辭微而顯其旨博而深准自張文潛以後一人而已李本寧云汝忠與徐子與最善往還倡和今按其集獨不類七子率自矜臆出之以彼其才

僅為縣丞以老一意獨行無所扳援麗豈不賢於人哉
詩話汝忠論詩謂近時學者徒欲謝朝華之已披而不知漱六藝之芳潤縱詩溢纒叢難矣故其所作習氣悉除一時殆解其匹

對月

人言天上月中有姮娥居孤棲誰與共顧兔銀蟾蝓冰

輪不載土桂樹無根株紛紛黃金粟歲歲何由舒一閉
千萬年玉顏近何如相違不咫尺照我闌干隅一杯勸
爾酒爲我留須臾

富貴曲效溫飛卿體

燒燭迷妝閣春旗隔步廊兩省京兆画三日令君香羃
窄芙蓉衩釵危翡翠梁羨他雙海燕先占鬱金堂

楊柳青

村旗誇酒蓮花白津鼓開帆楊柳青壯歲驚心頻客路
故鄉回首幾長亭春深水漲嘉魚味海近風多健鶴翎
誰向高樓橫玉笛落梅愁絕醉中聽

田園即事

明詩綜卷四八

壬

小溪小溪雨已過前村後村花欲迷老翁打鼓保社裏
野客策杖官橋西黃鸝紫燕聲上下短柳長桑光陸離
山城春酒綠如染三百青錢誰爲攜

秋夕

竹火煎茶寺菱歌戴酒航人間秋夕好第一是錢唐

東未齋陶師

牀頭社甕驚兒熟江口春船石首來欲就吾師謀一醉
講壇何日杏花開

勾曲

紫雲朵朵象芙蓉直上青天度遠峰知是茅君騎虎過
石壇風亞萬株松

曹大同 二首

大同字子貞南直隸通州人由歲貢生授光祿寺署丞有玉芝樓集

秋日田居

屏居謝人徒朔風吹寒雨遠樹旣盤紆漂雲亦交互愁
鴟戀故林隱豹諳長霧曩歷川光昏蒼茫野火聚耳目
暫無擾閒情託豪素拙訥罷干時賞心於此遇飛光忽
我道咄咄歲云暮眷言採三秀頽齡儻能駐

遊仙

有道百靈初無名萬物始九氣煉中和三元謝甲子化
昇隨感遷清越徹表裏玄圃御斑麟丹丘乘赤鯉左拍

明詩錄卷四十八

五十六

浮丘肩右躡羨門趾山成數寸塵海無三尺水長嘯宇
宙外超然得不死

張循占 一首

循占字元易蒲州人官光祿署正有嘉樹齋彙

軍城秋夜

寂寞軍城暮浮雲暗斗杓戍樓人未散絕塞馬仍驕夜
雨千門冷秋風萬木凋籌邊王相國金甲未應銷

錢元鼎 一首

元鼎字實夫桐城人鴻臚寺丞

偶出

臥榻淹三伏肩輿出早秋青溪通小市香稻滿平疇有

約過鄰舍忘機對水鷗已成迂嬾性身外更何求

沈堯龍

一首

堯龍字易之湖州人由貢生官鹽運司有列藝

集

丙寅誕日

年來蹤跡逐風塵忽感懸弧笑此身白髮有時還到我
青山何處不容人漢家鹽鐵錯銖重楚國旌旗日夜新
且與蘋洲亭上客一竿春水共垂綸

魏學禮

二首

學禮字季朗長洲人以歲貢選鎮江訓導擢國

子學正陞廣平同知時與劉鳳齊名合刻詩曰

明詩綜卷四六

主

比玉集

李時遠云季朗辭鋒甚銳當勝子威一籌

昭君怨

翠袖辭金殿青苔闕紫宮一作豔楚清衣香寒羅帳曉春盡玉階空明

月琵琶曲驚塵朔漠風

上悲情落管中

君恩原未薄妾夢向

來同

贈黎仲子

伊人結客少年場芳艸長亭正夕陽忽見雙魚來萬里
始知尺素下三湘布衣然諾輕朱建冠蓋縱橫憶鄭莊
郢曲自來多白雪遲君早晚賦長揚

孟

思

一首

思濬縣人通判有龍川集

秋夜期友不至

西風散秋聲，搖我庭間樹。月寒艸露光，山靜星河曙。林鳥相向啼，昆蟲紛若語。美人期不來，幽客徒凝佇。

周沛 三首

沛字允大，紹興山陰人，有浮峰集。

詩話周氏宗譜不言允大，登仕籍而徐文長集有哀周鄭州沛二詩。

別顧孝常

馬離鳴故羣，人去懷心知。憶昔違君始，意氣如連枝。如
何倏離別，旦夕殊歡悲。滔滔斯世士，孰與吾心期。言念
古之人，同心不同時。同時復睽隔，何用同時爲。

冬日

明詩綜卷四十六

天

滯靈迫冬日，山川掩重岡。引領望郊邑，遠樹鬱蒼蒼。浮
雲馳白晝，迅風激衣裳。中野少逢人，乃見鳴鴈翔。我有
一束書，因之以遠，將其多。至萬言其音悲，且傷終以重。
見辭翩翩各一方，攬涕下長坂，躊躇不能忘。

紅羅女

山東之賊紅羅女，用兵迅疾如風雨。白蓮授術成妖精，
能令照鏡生公卿。海內承平日已久，乍見干戈皆却走。
驅馳費盡中丞心，羽書未報收刁斗。紅羅女爾非男子，
身蛾眉粉黛當青春。跨馬彎弓無可樂，何用風塵來殺
人。山間小民饑餓苦，日辦官需夜猛虎。貧賤那堪更亂
離，慎勿橫行到吾土。

張之象 二首

之象字月鹿一字玄超松江華亭人以太學生入資選授浙江布政司經歷有剪綵翔鴻聽鶯避暑題橋倚蘭擊轅佩劒林栖隱仙秀林新草

諸集

莫子良云玄超詩爾雅冲澹興奇夢遠

春日遊燕子磯

古稱秉燭遊行樂恐迨暮策駕尋名山居然得真趣展宇開霽旭熙陽斂昏霧雲錦被奇峰水鏡含芳樹眷茲風日佳開觴藉蘭杜頗懷披襟友諸美難具晤流鶯稍出谷飛花已盈路暢哉人境外屏跡遺世故勿爲京洛士緇塵染衣素

明詩歸卷四八

无

梅花落

玉樹飛花早金閨引恨長雪明難見影風急易聞香舞處飄羅袖歌邊繞画梁歲華憔悴畫魂夢憶遼陽

楊文卿 一首

文卿字子質鹽山人稷山知縣轉南京都察院

經歷有鷗海集

秋日送曾公子實卿之延書扇頭

車馬翩翩送客行離愁遽逐海雲生三杯籬落菊花節一路蛩螢豆葉聲荒艸濁河連古戍悲笳明月動山城鯉庭趨後勞相報婚嫁如今累尚平

朱永年 一首

永年字仲開儀真人官光山知縣有朱仲子集

李時遠云仲子詩有曠達之趣

詠懷

南鄰競歌鐘北里吹笙竽我獨甘寂寞守此貧賤廬蓬戶不掩葦簟瓢常晏如負郭住窮巷門無長者輿彈琴發雅操誦詠詩與書安神在閨房憺泊思玄虛至人求髣髴榮名非所須

丘雲霄

四首

雲霄字凌漢崇安人嘉靖十七年貢士選南京國子典簿遷柳城知縣有止齋集

詩話止山驢驚作吏解組歸田栖息武丘山中閉關講學嘗與其友夜宿高明樓中夜有怪僂門作人語曰同遊不樂乎何臥之早也止山應

明詩綜卷四十八

三

之曰我戴屐而遊抱月而歌汝胡不吾和而同其樂何為昏暮而來也怪應曰不能止山曰吾亦不能怪歎息而去可謂不惑不懼者已松陽徐夢陽評其詩稱其雅澹動古景真情得

要之不蹈襲前人異乎七子之派者也

溪月初出水

溪月初出水照我清夜堂沈憂不成寐踟躕步寒光飛鳥深夜號遶樹林煙蒼有懷空自知默默心摧傷

怨詩

江石如龜甲隱隱浮明沙不障東之水偏驚游子查游子去鄉國長風吹斷霞斷霞只在天游子去無涯泠泠秋已老飄蕩未還家

寒露同李洗松宿方塘書舍

露重憐今夕秋深試薄寒溪聲亂籬落月色動柴關菊

密欲藏徑花嬌故傍欄相看疑夢寐秉燭問更闌

江晚

帆勢迎風疾灘聲入暮諠漁燈出疎樹客路問前村野
鶴冲煙迥山花帶雨昏寒江何處宿幽思未堪論

施

漸三首

漸字子羽無錫人歲貢生授海鹽縣丞有武陵

集

王元美云施子羽如寒鴉數點流水孤村惜其景物蕭條迫晚

意盡 俞汝成云子羽趣味悠深聲調雅雋在韋柳錢卽間

詩話子羽僅初舜咨與華子潛酬和時

號錫山四友三君皆非華敵子羽差優

贈人遊蘭亭赴陳山人約

靄靄深竹林林深阻修澗清川流其間懸崖俯可辨春
蘭日以芳風氣日以變君往對山人如逢昔人面

贈吳還

明詩綜卷四十一

三

山人爲客吳門久白髮蒙茸將被首興到青山不問家
笑來花肆常沽酒行路蕭然滿篋詩風流文采雅堪師
自言身是陶弘景說與世人誰得知

竹房

寂寂春窗下惟餘修竹陰忽聞人共語送客出深林

李才一首

才樂安人舜臣子官主簿

雲中寄周總戎

雲中日夕傳烽火萬里邊風羽檄催胡馬長驅光祿塞
漢兵不度白登臺三關擊鼓秋何急七郡蒸黎日轉哀

試問漢南諸將士只今誰是出群才

巖

怡 三首

怡字士和如臯人以貢為博平訓導有石溪集

擬古

采采南山桐十年成一琴製者豈不苦謂世有賞音持以奉君子不與我同心擬鑄鍾子期家無雙南金

石人

高岸勢若崩上有誰家墓已無墳上土尚有墳前樹樹下多行人車馬成廣路此地少豐艸幸免穴狐兔石獸半埋沒碑版知何處往者盡如此來者永不悟石人不解語空泣艸頭露

明詩綜卷四十八

三

曲塘

土墻茅屋竹籬笆楊柳風高燕子斜可是曲塘人好事家家屋角有桃花

李

奎 一首

奎字伯文錢塘人以布政司吏再考錦衣從事

有珠山集

彭子殷云珠山詩一以興象為宗篇多渾融句多藻鑠讀之爽氣滿前

詩話伯文周旋沈青崖於獄中者以氣義聞詩特寄興也

採藥

山中宿雨過嶺上明霞赤荷鋤入南畦藥苗始堪摘黃精種未鋤紫芝已盈尺隔水望茅茨還歸煮白石

明詩綜卷四十八

明詩綜卷四十九

小長蘆 朱彝尊 錄

歙州 汪立名 緝評

萬表 六首

表字民望鄞縣人正德末中武進士累官都督同知僉書南京中軍都督府晚號鹿園居士有

玩鹿亭棗

顧玄言云鹿園才清思遠章履高曠詩如空巖曲瀨宛轉寒夏時復滴瀝得幽閒真趣有章應物深致七言氣

骨稍弱

靜志居詩話鹿園裝帶翩翩志存開濟好從方外遊間與羅達夫唐應德諸公講性天之學值倭寇為患守土者力不能支公遠結少林寺僧傳格鬪之法倭猝犯黠山公仗釋孤舟統其徒二百人薄倭營縱火前擊敗之俄太倉來乞師公別募月空等十八僧選經面地負為將戰於翁家港諸僧衣錦製菜持杖口含盞蓋遇賊以藍塗面自地躍起若傑鬼前搏倭大驚以為神遂大敗倭追及嘉興之白沙灘盡殲焉後還官

明詩綜卷四十九

留都道出蘇州卒遇寇楊溼橋孤軍與戰得出身中流失以書報家人曰家世死戰唯吾持文墨論議未嘗身將兵今晚年增一箭瘢可無憾矣蓋萬氏自武略將軍斌戰死阿魯完河子指揮金事鍾與靖難兵戰死花園孫明威將軍武從征交趾師次檀舍江陷陣死武弟文襲兄爵守桃渚有龍夜戲潮浮水面耀望兩炬光以為賊火引強弩射之應弦落其一炬不知為龍目也龍負痛騰躍文船漂沒人稱射龍將軍三世不得裹骨歸葬故鹿園書云然鹿園子達甫仲章鎮園將軍孫邦孚汝水都督僉事皆材兼文武達甫有皆非集邦孚有一枝軒棗題江心寺云清聲龍聽法空階月送潮此仲章嚮句也

憫黎吟 三首

叅政平崖錢公出憫黎諸詠見示惻然傷懷因而有作

地何產柎與速民何畜豕與犢豕犢盈盤吏反嗔柎速窮年采不足刻箭為約安得銷 黎人借錢無約刻箭記之 歲歲生當剗吾肉負戈因拚一命償嗟嗟黎人誰爾牧

虎兕來猶可奔狼師一來人無存大征縱殺玉石焚昔
人鷗勦只一村鷗勦功成賞不厚大征廢子還廢孫殺
一不辜尚勿爲何況萬骨多冤魂

鑿而飲畊而食撫黎何事來相逼舊設有撫黎老人瘠牛可畊豈

不惜薑水那堪吞滿臆撫黎逼黎人之財則以薑水灌之遙明鎗火忽驚疑

一望旌旗我心惻撫黎至黎則明鎗揚旗以往羣黎艸木豈有知貪吏腹

削無休息攻掠犯順誰所爲撫黎毒黎還毒國

夏日飲許負外山亭即景

一亭梧竹裏迥出市塵間石逕緣蘿入江峰對座閒海
雲朝屢變山鳥暮雙還別去衡茅下思君嬾閉關

江南曲

明詩綜卷四九

客從潮陽來夜泊秦淮口鄉語人不知兒童聞拍手

宮人歎

莫向雲屏羨阿嬌暫將清泪度春宵帶圍自此拚長減
待得君王愛細腰

劉銳一首

銳字蓄之海鹽人世襲海寧衛指揮使有春臺

集錢幼卿云海村抽簪適輻寓意詩篇

與瀛洲諸老和酬卓然自振於儔伍

詩話海村少補諸生屢試不利乃食世祿里居暇飢散藥以厚德聞有
僕名木善射一日水鵝集寶聖寺鳴吻木射之貫其左翮鵝帶矢盤旋
良久竟集巾庭如聽語者海村曰嘻必木也命拔其矢縱之不能飛
乃命木集之旬日創愈向主人鳴舞翔而去海鹽人至今能道之

和徐東濱

何處幽棲好城西有茂林山來當戶翠竹長隔墻陰哺

子飛梁燕窺魚下水禽閉門無所事赤日任流金

余承恩

四首

承恩青神人官永寧叅將有鶴池詩集

詩話鶴池爲大保蕭敏公孫肅敏有社稷功世襲錦衣衛指揮其子軒權倖調外衛故鶴池終身不得侍廷至蘇詩集八卷銅梁張官甫序之

感興

白日沉西陸返景流東岑端居屏塵翳欣然理鳴琴大雅僉不悅馳情在鄭音違俗信靡合安可同荒淫達人宜止足嘉遜我所誥富貴苟非義一唾麾千金

答草池約汎蓉溪

春來花鳥總關情夜雨愁聽不到明怪殺主人猶病酒晴江鼓柁放舟行

泛舟

明詩錄卷四九

三

芙蓉溪水三尺強蒼蒼兩岸花艸香若待長江新漲合撐舟直上小茆堂

望忠州

高江落日片帆秋岸上漁罾次第收無數峰巒雲霧裏舟師指點認忠州

戚繼光

二首

繼光字元敬登州人世襲衛千戶以叅將備倭浙東大破倭於台州以副總兵鎮福建大破倭於平海衛閩寇旣平以都督同知召理戎政出爲薊鎮總兵進左都督加少保卒謚武毅有止

止堂集

錢受之云少保結髮從戎間關百戰綏靖閩浙功在東南生平方略欲自見於西北者十未展其三故其詩多感激

悲壯抑塞借張之詞君子讀而悲其志焉

詩話少保平倭之功戰勝攻克撰有紀効新書在劄日與總制譚公綸樽話折衝撰有練兵實紀論者比之孫吳韓白為軍中有暇輒與文士

接席賦詩集名止止堂曰愚愚居曰夢夢是亦好奇矣

盤山絕頂

霜角一聲州木哀雲頭對起石門開朔風鹵酒不成醉
落葉歸鴉無數來但使雕戈銷殺氣未妨白髮老邊才
勒名峰上吾誰與故李將軍舞劒臺

度梅嶺

溪流百折遠青山短髮秋風夕照間身入玉門猶是夢
復從天末出梅關

明詩錄卷四九

四

俞大猷

一首

大猷字志輔晉江人世為百戶嘉靖中舉武進
士累官都督同知佩征蠻將軍印進右都督卒
贈左都督謚武襄有正氣堂集

挽薛養呆

伐木風不還今古幾心知我與君結契相期弱冠時平
生一然諾盛衰永不移我善君相助我過君相規嗟君
忽奄逝一老不憊遺昔為暫離別今作長相思戚戚重
戚戚良朋今有誰

張

通一首

通鳳陽人官至都督僉事

遊西林菴

野寺蕭條一逕微，山僧相見語禪機。雲深石洞玄猿伏，煙鎖松林白鶴歸。上界疎鐘通碧落，邊城鼓角送斜暉。浮生自覺渾無定，欲解鳴珂問釣磯。

周子德一首

于德號南墩，淮安人。官至京營都督僉事。

平烏刺江

春蒐馬跡遍南荒，夷獠新降罷畫疆。絕壑危巖通鳥道，飛旌疊鼓遶羊腸。黔瀘東下歸辰浦，箬西來接夜郎。王化遠行銅柱外，炎州萬里盡梯航。

張元凱

十一首

明詩綜卷四九

五

元凱字左虞，吳縣人。蘇州衛指揮，有代檀集。

元

美云將軍詩格務躋武德貞觀其語寧有瑕壁而無完瓊珠汰陳而便之新非有沉深劇刻之思未易致也 錢受之云左虞以擊漕達燕鮑覽觀官闕苑囿親見齋宮雜壇之盛作西苑詩竊比諷諫之義王長公序其詩以沈始興曹竟陵爲比左虞夷然不屑也左虞沒長公伏日曝書得其行卷歎其知之未盡爲詩一章屬其子孟孺酌而焚之殯官

詩話左虞西苑宮詞高出元美之上元美比於沈慶之曹景宗仍以武夫遇之未爲知己也

春日游西苑

宣室臨西苑，靈臺對籍田。宮鶯迷綠雨，廐馬飲清川。柳引金堤直，松含玉殿圓。先皇受釐處，寂寞鎖春煙。

西苑宮詞

十首

肅將上帝祀，明堂寶鼎昭。回日月光九獻，不須歌舊曲。詞臣昨已撰芝房。

秋殿清齋正受釐迎和門外立諸姬大官不進麒麟脯
御撰惟供五色芝

陳詞瘞玉奏鈞天西苑宮牆近籍田水旱恐煩祠后土
未央深處好祈年

夕烽千里照甘泉一紙降魔勅已傳急遣六丁乘羽駕
火輪金甲淨幽燕

靈藥金壺百和珍仙家玉液字長春朱衣擎出高元殿
先賜分宜白髮臣

通天臺上接三台景命重臨清醮開拜舞不同郊社禮
科儀一一聖人裁

香通紫氣靄晴空靈貺神休集聖躬垂拱萬年如一日

禮臣何必議青宮

明詩錄卷四十九

六

金符寶笈護雲英鸞鶴銜將入上清拜受玉霄龍鳳簡
元陽象一字分明

蓬萊方丈可梯航勾漏丹砂近寄將貯貯銀山高幾許
試將玉尺殿中量

瑞氣祥雲薄海濱遶藩齊獻百千春進來白鹿高於馬
馴擾金堦不畏人

李元昭 一首

元昭字用晦杭州人世襲千戶有岫嶽山房集

送周虛巖歸吳

返棹歲將晏離亭酒共酌 一作亦深 島雲寒沒影江日凍生陰

莫惜飄蓬跡應傷折柳心丘中別同調聊復理鳴琴

黃喬棟一首

喬棟字以藩晉江人官叅將

半峰菴聽秀上人彈琴

高僧理鳴琴古調盈人耳濤生松下風龍起鉢中水聽
罷猶冷然月出疎篁裏

張如蘭一首

如蘭字德馨南京羽林衛世襲指揮官至淮徐
漕運叅將以子可大貴贈特進榮祿大夫右都
督有功狗集

吳門夜泊

明詩綜卷四十九

七

帆影初抽落日斜江橋風湧太湖沙行人莫上蘇臺望
無復吳王苑裏花

狄從夏一首

從夏字以忠臨清衛人官叅將

月夜同劉天山作

孤館寒燈夜相看聽晚笳清宵醒客夢明月落梅花碧
海潮聲急清霜雁影斜不堪憐歲暮况復是天涯

袁應鞞一首

應鞞字仲子揚州興化人守備

鄭司馬入塞歌

十載籌邊鬢欲秋玉門生入未封侯君王豈惜師中命

尚有山陰十六州

奚汝嘉一首

汝嘉字子美江都人揚州衛百戶

旅懷

十日雨初霽一年春已殘
苔痕蝕徑滑艸色釀陰寒
昔悔從軍易今悲作客難
殊方有桃李能得幾回看

陳鶴十首

鶴字鳴野紹興山陰人世襲百戶有海樵集

王敬

美云鳴野詩飄宕悽惋 顧玄吉云鳴野詩初擬自覩以還晚得大曆中格 錢去病云海樵七古流麗似李頎七絕爽朗似王昌齡 老所建而海樵集中酬周山陰張會稽搗酒見訪之作中云相攜直上息柯亭恐是海樵故室中物矣五言如近海潮通郡連山躡入樓山川留別夜風雪望鄉人孤月長隨棹寒潮自到門繞廬松葉暗穿竹水聲

明詩餘卷四九

八

齊明月幾家好故人今夜俱七言如床下鳴蛩偏入夜風前白苧不宜秋風塵會面猶難卜世事傷心只自知細雨殘燈歧路酒清江紅葉寺門舟薄游雨見雁歸窠多病却憎花滿樓高士遠栖滄海曲好山多近永嘉場山深倦鶴猶依樹風定飛螢忽上樓比於田水月雖才鋒不及而鑄詞

差醇

夜坐見白髮寄別朱仲開張甌江

坐久北風起江聲帶遠沙
客愁初到鬚鄉夢不離家
林靜無殘葉燈寒有落花
懷君夜難寐別緒轉如麻

高郵贈龔山人

近苦江東水轉憐淮北居
入秋嘗白稻留客鱸青魚
樹柵春收犢穿潮夜灌渠
期君結鄉社同著養生書

泊京口望金山寺

南徐一片石千古柱中流
繞樹開僧舍緣空結梵樓
疎

燈明水底落月挂潮頭向晚禪鐘起風吹到客舟

題楊法部容閒閣

閣傍江城外窗開雲水間祇因塵境遠自覺主人閒日
落見歸鳥月明看遠山移船候潮至相送野僧還

寫山水

夜來風雨惡落葉打柴關曉起敞溪閣亂雲猶在山

題畫贈姜明府

暮雲春樹路千重雪後看山到處同夜永燈寒無過客
月明江色滿樓中

送張伯淳還關中

憐君獨棹渡黃河西北山川入雍多料得到家春未至

明詩綜卷四九

九

馬蹄半在雪中過

送王諫北上

東去春潮到驛門半江風雨近黃昏由來知己難為別
不是殷勤戀酒尊

吹笛懷友

玉笛橫吹入夜分中天華月度流雲苔川兩岸春風起
飛盡梅花不見君

池上聽陳老琵琶

夜深池上弄琵琶萬里銀河月在沙莫向尊前彈出塞
只將邊將未還家

陳

第十二首

第字季立號一齋連江人初爲學官弟子俞都督大猷召致幕下教以兵法起家京營出守古

北歷遊擊將軍有寄心集五岳兩粵游草

錢受之云季立

不得志繼俞戚之後登壇爲名將拂袖歸里尋聞焦狀元弱侯老而好學粟糧白門雜經析疑扣擊累年卒爲名儒論兵論文皆鑿鑿有根據詩話一齋投筆從軍受知於譚襄毅俞武襄戚武毅三公江陵說沒論者謂武毅不宜於北徒之嶺南一齋作塞外曉荒行有云年年至後罷防賊出塞燒荒灑水北枯根朽草縱火焚來春突騎飢無食又云隆慶二載譚戚來文武調和費心力從前獎改頓掃除臺城兵器重修餉迄今一十五年間閩閩雞犬獲寧息譚今已死戚復南邊境危疑慮巨淵患難易共安樂難念之壯士摧頽色論者不引今昔觀紛紛搜遺巨淵感又送戚都護絕句云轅門遭變滿幽燕不見烽煙十六年誰把旌麾移嶺表黃童白叟哭天邊論其詩扼腕於封疆之事深矣一齋儲書最富余嘗游閩瞻發林秀才個持其後人所輯世善堂書目所載燿燿下閩之見唐五代遺書琳琅滿目如披宣威唐述之藏多平生所未見不覺狂喜秀才許至連江代購贈年得報書則已散佚徒有惋惜而已

歲暮客居呈弱侯

明詩綜卷四九

十

仲尼本周流忽發歸與歎意在就六經匪爲思鄉串嗟我老無聞託興游汗漫邈想古通人反側常宵半秣陵一君子少小登道岸嗜學自性成義易旦夕翫近得從之談恍上中天觀詩書數千載立語窮真屢欣然遂忘家何知有歲晏

邵武舟次

樵川泛輕舟青山起當面薄霧頰往還奇峰互隱見灘灘若峻坂下下如飛箭秋容西楚同人語南方變茂樹雜村煙澄溪勝江練始知溯洄艱轉喜隨流便對景持一杯幔亭未足羨

禹碑行

岳麓神禹碑何年鐫刻之真蹟雖莫窺字體殊瑋奇儼
如冠冕之獨立矯若鳳鳥之來儀或盼而連目或聳而
並肩或展而雙足或握而兩拳神藏蘊蓄意騁踴躍旣
非鳥跡之踏踏亦非垂露之涓涓篆隸八分抑又邈焉
計歷年之旣久何點畫之新妍豈鬼神之默護故歲久
而彌鮮據譯讀之恍惚未必當日之真傳余過長沙弗
覺偶至湘潭返船直肩輿而迅步遂冒雨而陟巔喜胸
襟之豁滌獨坐翫而弗旋昔韓退之嘗千搜而萬索至
咨嗟而涕漣余實迷途之未遠無亦此生之宿緣

山中早秋

春夏詎能幾淒淒白露還秋容先到草客意未離山石

明詩綜卷四十九

十一

鼠窺禾去清蟬抱樹間人生衣食外焉用苦間關

江心寺除夜

偶過江心寺何期又歲除百年俱逆旅信宿即吾廬岸
隔遙沽酒厨寒剩煮魚客游隨處好鬢髮任蕭疎

客中立秋

蒸濕前朝雨淒涼今夜風秋聲先蟋蟀露氣到梧桐頓
覺絺衣薄尤憐旅橐空潞河問舟楫明月向吳中

閩關旅夜

已是吾鄉土離家尚十程疎窗通野色孤枕傍松聲搖
落秋難賦悲歌夜不平僕夫催曉發燒燭待雞鳴

南岳舟中

吳門一水接楚塞衆山連書史同昏旦江湖且歲年洲
迴蘆荈荈櫓動燕翩翩何處爲南嶽雲開望杳然

維揚謁文信公祠

萬死艱難地千秋伏臘新山河終破國天地已成仁江
橋南中像巖松雪後春徘徊歌正氣不覺淚沾巾

過薊州

燕京八千里復作薊門行剝有溪山興能忘沙塞情朔
風摧短艸寒月近長城流涕二三策何人似賈生

追懷宜黃大司馬譚公

昔年飄泊入燕京制府憐才意不輕獻策獨過司馬署
分符旋赴薊州營祇誇相國知韓信無復功臣妬賈生

明詩綜卷四十九

主

秋草春風今日淚不堪回首楚江城

元夕宿泉州洛陽橋

春風又渡洛陽橋柳色青青伴寂寥回首故園今夜月
滿江燈火上寒潮

李言恭

六首

言恭字惟寅岐陽武靖王裔孫襲封臨淮侯環
衛侍直留守陪京加太保有青蓮閣貝葉齋游

燕諸集

穆敬甫云臨淮詩清遠有調庶幾大曆中語胡元瑞云
敬美序臨淮詩郭定襄後一人咸謂寔錄子以惟寅文雅

尚當過之

錢受之云惟寅詩風氣婉弱時有韻
致如夢回芳艸遠人去落花多藝苑至今傳之

詩話李惟寅詩如四姓小侯橋門列

席雍容韋帶咏咤彭蠡之氣都盡

花朝

二月寒猶峭，燕山雪未消。春來無艸色，病裏又花朝。鴻
鴈鄉書斷，關河旅夢遙。武陵溪上約，今已負漁樵。

賦得匡廬山

匡廬凌碧落，青磴與塵分。湖海遠還見，雷霆低不聞。石
門鳴宿雨，瀑布濕流雲。獨有山人屐，常隨飛鳥羣。

送陳玉叔郡守淮陰

別思深難遣，離魂暗欲銷。人隨流水去，心共暮雲遙。野
市懸高岸，江城響夜潮。所嗟相憶處，風雨正蕭蕭。

送仲弟南還兼懷老親

無限離愁匹馬前，况多風雨斷鴻邊。板輿未得歸潘岳，
春艸何堪送惠連。伏枕夢回滄海月，登臨望極白雲天。

明詩綜卷四九

圭

飄零若見高堂問，雙鬢休言異昔年。

李僉憲招飲黃鶴樓

勝地慚非作賦才，清尊今向大江開。當年黃鶴雲中去，
何處梅花笛裏催。一作風起一作潮聲喧島嶼，日斜帆影上

樓臺相逢俱是他鄉客，衰艸淞陽漫復哀。

顯靈宮

先帝祈靈太乙祠，重來空憶翠華旗。殿中香火儀猶具，
海上仙人事轉疑。客與方書閒指畫，老來詩律舊心思。
調高身健慚時輩，高閣憑闌眼故遲。

詩話京師顯靈宮在宮城西長慶建以祀王靈官者也靈官滕像長
陵海藏之軍中有禱輒驗及金河川昇不可動宣德初拓其祠額曰大
德顯靈宮復建東西二閣嘉靖三年警龍虎殿以奉元武焉閩中留
題者衆以惟宣爲擅場其云海上海上仙人者相傳滕像獲之東海中

呂時臣 十首

時臣字中甫鄞縣人有甬東山人集

陳致子云中甫詩頗有高岑遺

詞

詩話中甫以避仇客歷下與李中麓楊夢山切劘酬和既轉客青州衛莊王邸起高樓東向眺遠樓成王於望後四日置酒召客時日景既盡珠星尚微王未盡客坐憑闌語笑已而月上王歎甚因命曰待月樓詩客賦詩中甫詩云川原夕氣交暝色自相向月猶藏海底人已坐樓上王賞擊謂得待字義手鵬奉之俾居客右晚客滯宣王所客死河南中甫年六十始生擯於句章之夕陽里自撰墓銘後十年乃卒歸樹葬焉

詩品在中麓夢山之間同時曳裾王門者多遜之

襄陽蹋銅蹄

青蒲沒漢水白馬度襄陽男兒但得意何處非故鄉

山中吟

桃源渺何許武陵萬仞山緬想秦時人生死桃花間

明詩綜卷四十九

古

來逾千載曾無幾人間桃樹摧為薪桃源平作田雞犬入租稅焉可住神仙

交州古劍歌

古交州天陰日落鬼啾啾終宵白氣衝牛斗過客往往驚回頭主人知此有靈物呼兒掘得雙吳鉤螭蟬半蝕銅花綠淒淒霜鏗寒光流古來異物不易取令人得之反生憂放之唯恐蛟龍怒卷之猶畏神鬼愁亟命冶人復解鑄神器恐遭真宰怒不然仍貯空匣中恣爾含光在泥土

秋田為李生得衣字

明農兼課子田舍有書幃穰稭霜初下雞豚秋正肥西

風菰米飯落日豆花靡已得遺安計無嫌老布衣

夜懷

起來喧不減策策動涼風月暗蟲聲裏人孤樹影中南
堦寒尚早北地候難同想到鄞江上秋花滿舊叢

留別少府子魯

木落見中州遙連白帝愁黃河臨斷岸明月土孤舟作
客已多歲還家又暮秋思君西下日寒葉滿江流

次李大參韻留別

河北中秋盡江南九月歸艸深藏虎穴潮滿上漁磯田
舍春新稻山妻補舊衣到家貧自得莫怪與君違

金山寺

明詩綜卷四九

五

萬古一卷石東南何壯哉半江截吳楚兩岸瞰樓臺僧
飯蕪城乞人煙鐵甕來春深龍聽法風雨帶潮回

諸公邀登甘露寺留別

天風飄忽苧袍輕兩度登臨慰客情疎磬雨催山寺曉
亂帆春放海門晴江迴鐵甕三吳盡潮過金陵七澤平
明日別離何處問斷腸煙樹漫蕪城

再經鍾吾懷許兵馬

去日黃河邊水深不可渡故人久不回今作行人路

鄭若庸

五首

若庸字中伯崑山人有蝓蛻集

李時遠云山人與茂秦齊名其詩風格稍弱

詩話中伯曳裾王門妙擅樂府當填玉琢詞以詵院妓一時白門楊柳少年無繫馬者羣佼患之乃釀金數百行薛生近究作繡襦記以雪之

秦淮花月頓復舊觀承平勝事雖小堪傳今之
秋元寒鴉想像昔年之酒旗歌扇良足豔也

秋涉

蒼山崔巍照秋渚紅樹離離夕陽渡行人涉水更看山
馬足凌兢來復去雲際人家望欲迷松關蘿徑隔煙扉
山僧臥穩西巖寺時有鍾聲落翠微

王內輔三泉將命太嶽

神嶽蟠中極凌虛勢自孤星辰低絳闕雷雨護清都山
色遙連蜀江流直入吳金箱有靈秘到日佩真圖

衛水離歌

天涯何處客愁新濁酒初酣欲問津莫道三秋歸計晚
尊前猶有未歸人

明詩綜卷四九

六

送張甘蘖刺史

衛水樓船曉向東青山南望一重重因君此別增鄉思
目送春帆細雨中

丁小山赴浙東藩幕值余清泉賦別

清秋衛水汎樓船京國逢君已十年漫對綠尊悲白髮
天涯去住一凄然

顧聖少

二首

聖少一作字季狂吳江人

留別謝茂秦

相對忽不樂愴然傷我心他鄉有同懷胡爲遽分襟憶
昔醉燕市擊筑誰知音意氣獨吾子排難輕千金重以

易水歌兼之吳會吟論交豈不遠投分遂至今我亦慕
三閩南去湘之陰楚山一何長楚水一何深他日遙相
思鹿門還可尋

送李汝學還上黨

傾蓋同為客攜尊復送君悲涼誰作賦南北此離羣坂
沒羊腸雪山橫熊耳雲相思豈無鴈可待九秋聞

尤嘉一首

嘉字子嘉嘉興人有西陵集

詩話子嘉亦題康王客穆敬甫錄其詩以比謝四溟句如偶因看竹來
僧院不為求魚坐釣磯頗有自適之趣康王賓客無多而吾里有二其
一則仲舍
人春龍也

送劉山人往太原謁梁李二使君

明詩錄卷四九

七

平原日落雁聲寒送子西游歲欲殘共惜異鄉裁別賦
更於何處解征鞍山橫熊耳尖如削路遠羊腸曲似盤
自是陳蕃能下榻匣中長劍不須彈

徐渭 十三首

渭字文清真字文長山陰人有櫻桃館集陶周望

詩雜出於中晚宋元往往深於法而略於貌 袁中郎云文長詩有一段不可磨滅之氣如嗔如笑如寡婦之夜哭窮人之寒起當其放意平
疇千里偶爾幽峭便是鬼語荒墳 陳臥子云文長亦有正音 李舒
章云文長詩材粗點雅人所少然其一往有雋處如部曲少將新跨紫
騮

詩話文長詩原本長吉間雜宋元流派所謂斐然成章不知所以裁之
者其自評云吾書第一詩二文三畫四然詩文未免繁無不若畫品小
塗大抹俱
高古也

入燕

董生抱利器鬱鬱走燕趙賤子亦何能飄然來遠道行
止本無常譬彼雲中鳥朝飲西園池暮宿北林杪感事
復懷人生年苦不早欲弔望諸君跡陳知者少垂首默
無言春風秀芳艸

柳元穀以所得晉太康間家中杯及瓦券來易余

手繪

遙思家中人有杯不能飲孤此黃兔密伴千三百稔券
鏹四百萬買地作衾枕想當不死時用物必弘甚尊壘
羅寶玉裹袂賤繡錦豈有織纖指捧此鍛泥葦存亡隔
一丘華寂迥千仞活鼠勝死王斯言豈不審

送蘭公子

阿翁學師
也揚州人

太

耶溪芹藻色相伴秋荷老公子竭重來傷心那可道會
日苦無多相別一何早八月廣陵濤一葉渡殘照

俠客

結客少年場意氣何揚揚燕尾茨菰箭柳葉梨花槍為
弔侯生墓騎驢入大梁

陰風吹火篇呈錢工部

陰風吹火火欲然老鼻夜嘯白晝眠山頭月出狐狸去
竹徑歸來天未曙黑松密處秋螢雨煙裏聞聲辨鄉語
有身無首知是誰寒風莫射刀傷處高旛影臥西陵渡
幡底颯然人髮豎髑髏避月攪殘黍中流燈火青熒熒
饑魂未食陰風鳴莫言墮地永為厲宰官功德不可議

詩話此美錢工部能憫國殤召僧施食而作陰風吹火八句句句警覺
具體長吉而得其骨髓者也以下禪經拖香去嘔心人遠矣稍爲莫易
存之結語尤
索然無味

春日過宋諸陵

葉葬未須憐生時已播遷威儀非舊典世代是何年過
客悲山鳥王孫種墓田回看隴頭樹似接汴京煙

嚴先生祠

碧水映何深高蹤那可尋不知天子貴自是故人心山
靄消春雪江風灑暮林如聞流水引誰識伯牙琴

懷陳將軍同甫

飛將遠從戎翩翩氣自雄椎牛千嶂外騎象百蠻中銅
柱華封盡昆池漢鑿空雁飛真不到何處寄秋風

明詩綜卷四十一

十九

與客登招寶山觀海遂有擊楫岑港一窺賊壘之
興謹和開府胡公之韻奉呈

滄海遙連雉堞明登臨喜共幕賓清千山見日天猶夜
萬國浮空水自平不分番夷營別島願圖方略至金城
歸來正值傳飛捷露布催書倚馬纓

岳公祠

墓門朱戟碧湖中湖上桃花相映紅四海龍蛇寒食後
六陵風雨大江東英雄幾夜乾坤博忠孝傳家俎豆同
腸斷兩宮終朔雪年年麥飯隔春風

宴遊爛柯山

二首

偏裨結束佩刀弓道上逢迎抹首紅夜雪不勞元帥入

先擒賊將出洞中

羣兇萬隊一時平
滄海無波瘴嶺清
帳下共推擒虎將
江南只數義烏兵

夏相國白鷗園

白鷗池水拍天平
相對瓊樓入太清
試問歌臺生艸處
當時可許外人行

沈明臣

九首

明臣字嘉則鄞縣人有豐對樓集

莫廷韓云嘉則詩豪俊清婉情至之

語足無

古人

詩話嘉則文長同在胡少保宗憲幕府並受少保知遇督府周防嚴密文長恒戴敵烏巾衣白布潛衣非時闖入或出昵飲夜深猶聞戢戶以待嘉則微徽不阿少保遙望見必起立嘗譏將士於爛柯山酒酣樂作嘉則於席上賦凱歌十章吟至狹巷短兵相接處殺人如艸不聞聲少

明詩綜卷四十九

辛

保起持其鬚曰何物沈郎雄快乃爾命刻石置山上及少保死請室中嘉則走哭墓下持所為誄過為詔寬比於文長懼禍發狂者相越矣嘉隆間士大夫以篇什相高景繁當者莫若傘州於時吳明卿之戲甄涇汪伯玉之太函李本寧之大汲山房諸集以及劉子威馮元成余仲芳屠繹真之徒禮丘肉林愈多愈極下及布衣如王承父王百穀輩咸以多相尚嘉則先後積詩七千餘大安得精然繁之承父則雖銳腐齒間有神芝即屬勢芻不無嘉實非若諸君之叢菁荒茅紛然彌望也

大樹村劉氏少婦打虎行

潤州城南山簇簇
四月麥黃桑柘綠
大樹村頭劉氏居
短墻幽院參差屋
曉炊未罷日始高
宰地猛虎來咆哮
老小出門盡驚走
犬亦吠虎聲嗥嗥
虎聞犬聲急轉步
一口斃之如搏兔
欲從虎口奪狗還
老嫗抱孫逢虎怒
劉家少婦奪老姑
氣猛視虎如匹雛
手持鋼叉刺虎目
虎血濺面紅糝糊
昨從大樹村前走
少婦滌場猶鬢首

弱體孱然花不如徐家女子劉松婦

抗首

抗首望西秦朝廷急用人玉關疎控扼紫塞滿荆榛痛
昔籌邊賦

錦衣衛經歷沈鍊所上有賦

憐君侍從臣誰爲謝安石談笑淨

風塵

送箕仲之衢州

古路三衢外青山太末餘樵迷仙子質廟過偃王徐楚
橋秋全熟吳楓江漸疎舊游題石處好爲一躊躇

顧晉卿席上聞其弟益卿憲副南越之捷喜而賦
之

廿年豺虎劇縱橫百粵遙傳一日平再睹樓船橫海出

明詩綜卷四十九

主

更標銅柱伏波名天青馬嶂春銷甲雨過龍川夜洗兵
誰道虎頭非將種請纓原只是書生

浣紗石

不見浣紗人空留浣紗石石邊春艸痕想見羅裙色

凱歌

銜枚夜度五千兵密領軍符號令明狹巷短兵相接處
殺人如艸不聞聲

蘭皋竹枝

東村西村姑惡啼家家麥熟黃雲齊春蠶作繭桑圍綠
睡起日斜聞竹雞

過崑山

桃花楊柳共西灣曾唱菱歌帶月還春色茫茫今莫問
滿城煙雨過崑山

無題

夢裏相逢恐未真世間何物不傷春馬蹄明日天涯路
誰是燈前昨夜人

王寅 二首

寅字仲房一字亮卿歙縣人有十岳山人集汪禹

亮卿詞
意起逸

詩話仲房少走大梁聞詩於獻吉不遇遂從少林僧習兵法海上用兵
倣胡尚書督府尚書不能用竟以敗晚緝鄉人之詩曰新都秀蓮集其
持論頗偏與岳東
伯今兩瑤華相類

吳山秋晚

明詩綜卷四十九

圭

有客閒居無奈閒為看秋色一躋攀百盤細艸斜陽路
三曲澄江隔岸山野寺最宜紅葉後孤鐘偏在白雲間
賞心又得逢僧話此後幽期數往還

答金在衡訊歸

秣陵官樹葉初飛客路何人為授衣我亦驚秋同海燕
故鄉端在社前歸

康從理 四首

從理字裕卿永嘉人有二雁山人集胡元瑞云裕卿

布衣
之雄

詩話裕卿任俠談兵聞關戎幕劉將軍于高建齋畏陵病革裕卿馳赴
與訣經紀其喪扶其柩至武林遠近皆義之居燕借黎惟敬輩游西山
其倡和詩僅存餘多散佚
太倉曹子念收而刻之

再至京口有懷金焦舊游

層城舒遠目迢遞送歸鴻歲月更新曆江山憶舊蹤鐘聲春浪靜燈影暮流空媿有東林約無因問遠公

同王必漸言懷

江頭木落鴈初飛客子傷心賦授衣御夢不緣千里隔浪遊空說半生非雲山是處堪招隱塵海何年可息機漫向天涯愁極目幽懷已負北山薇

懷顧太學

登樓風雨暮蕭蕭久客離魂黯欲消楚樹吳雲春寂寞塞鴻江燕歲迢遙新愁芳艸天涯路舊事梅花月下簫今日分飛悲萬里憑闌搔首思無聊

明詩綜卷四十九

三

送陳京兆致政還白下

挂冠東去共稱賢天外浮雲意渺然不是逢萌因世難祇緣弘景嗜神仙琴中白雪驚人調江上青山負郭田無限長干花柳色春風不乏杖頭錢

郭造卿一首

造卿字建初福清人諸生爲少保戚繼光幕客

有海嶽山房存彙

葉進卿云建初詩諸體無不工

寇退鄉人回口占代書

城南烽火近何如留滯無從訊起居百里便同千里隔家書翻比捷書疎清秋涕淚唯懷土白髮庭闈正倚閭欲寫愁心愁不盡憑君傳語到吾廬

王翹三首

翹字叔楚蘇州嘉定人嘉靖中倭亂嘗居幕府
贊軍事有小竹集

詩話叔楚工畫竹予嘗觀其真蹟爲賦長歌不知其幕府才雄也邑人侯大年述其繪竹蟲更精惜未得見小竹集一冊中間贈酬諸將之作多居

賞火謠
并序

吳城六門莫盛於西閫六月初賊舉火焚楓橋
達晝夜時宰坐睥睨間飲酒顧望無異平日時
烈風大作煙焰蔽天不辨咫尺哭聲遍城內外
或指城上云勿啼哭看城上賞火吁有是哉作

賞火謠

明詩綜卷四十九

三首

金閨門外賊火赤萬室齊燒纔頃刻城頭坐擁肉食人
對火銜杯如賞春城中哭聲接城外宰獨何心翻痛快
憤兵獨有任公子夜半巡城淚不止縋城躍馬出沙河
義師都向湖心死

客夜

山月漸高低燭光有客逗遛衣滿霜淒淒獨夜還自語
茫茫一水遙相望黃花勸酒酒不醉白石放歌歌轉長
弧矢天涯男子事錯將岐路卜行藏

秋懷

碧天大火未全收一雨空庭帶葉流不爲無家悲落莫
他鄉燕子早知秋

明詩綜卷四十九

明詩綜卷四十九

五

杭州圖書館

明詩綜卷五十

小長蘆 朱彝尊 錄

率水 程道原 緝評

陳 淳 二首

淳字道復後以字行別字復甫長洲人國子監

生有白陽集

張石川云白陽從游衡山稱入室弟子有雲林之瀟灑而無其莽同石田之高潔而通於和所謂遠

性風疎逸情雲上者邪 錢功甫云先生詩瀟散閒雅澹自然如梧桐半階月楊柳一簾風流水去無住停雲意自閑晚涼生竹塢薪水溢

花果成臻妙境 錢受之云道復少師徵仲天才秀發畫工寫生一花半葉淡墨斜針非畫工可及也詩取適意不求工

靜志居詩話白陽寫生全學石田詩亦微之特少神解耳

畫梅

風引上春香雪弄南枝色為有惜花心樓中莫吹笛

明詩綜卷五十

聞鳥

重重煙樹鎖招提野客來尋路不迷纔過板橋塵土隔

落花無數鳥爭啼

彭 年 一首

年字孔嘉長洲人有隆池山樵集

徐伯臣云孔嘉詩中含沉鬱之思外

被組織之華聲調和平詞致暢越可謂風流自命者也

王元美云彭孔嘉如光祿莫使臣鉅釘許整而中多宿物

詩話孔嘉人品足亞徵仲何穉孝長歌云隆池處士彭孔嘉徵仲並軼吳人誇特詩不及

庚申秋書事

內廡傳焚廿四坊錦雲花隊一朝亡渥注未見來天馬

槃木無聞貢白狼此日朝廷思李牧他時文簿抑陳湯

運籌急為據長策薄伐宜城古朔方

陸 治 二首

治字叔平吳縣人歲貢生有包山遺詩

詩話叔平遊道復之門當時卿曲之論謂詩得其興
画得其趣然叔平画以工緻勝詩則與道復同流

治平寺納涼

竹根雨過石苔斑
鐘梵蕭然晝掩關
坐愛微涼生碧殿
忽看飛雨失青山
雲分暝色來天外
風卷潮聲落樹間
最是晚晴宜眺聽
夕陽橫抹蓼花灣

桃花楊柳舞鴨圖

二月吳淞水上灘
柳絲風急絮漫漫
詩翁賦罷閑凭處
花滿春池鬪鴨欄

錢 穀 一首

穀字叔寶長洲人有懸磬室詩

詩話叔寶負無典籍遊文徵仲之門日取插架書讀之以其餘力點染
水墨趣入逸品晚著敝履題曰懸磬室王元美為賦詩所云空梁頗受
落月色此窗靜映涼風眠者吳也手抄異書最多至尤不倖倣鄭虎臣
吳郡文粹續成續編聞有三百卷其子功父繼之吳中文獻藉以不墜
與公瑕伯穀奈
走相門者遠矣

夜登虎丘次韻

遙憶梅花閣
還思修竹林
煙迷山徑窅
雲鎖石苔深
香界期重宿
筠亭擬更臨
悠然停采艦
燈火晚陰陰

居 節 四首

節字士貞吳縣人有牧豕集

錢受之云士貞画法簡遠
有宋人之風画家多稱之
而鮮有知
其能詩者
詩話商谷繩削斤
斤不失晚唐家數

晚坐

鴉背夕陽盡柴門暮色初山寒漸風露人語半樵漁落
葉聞碓急蘆花映日疎年年楚江上不見雁將書

雨後

綠嶼青林白練溪艸深市井路全迷雲將片雨歸何急
麥釀輕寒秀欲齊一水遙連蕭寺外千山不斷石橋西
欲營三徑添松菊立盡殘陽見鳥栖

重題自画小景贈戴子文去画時四十年矣

點染青山四十年寸縑不改舊風煙散人漫竊江湖號
未買松江一釣船

村居圖

明詩餘卷五

三

茅簷日暖燕交飛雲過墻陰濕翠微中酒經旬掩關臥
蒼苔渾欲上人衣

周天球

一首

天球字公瑕長洲人諸生

中秋長干曲

玉笙低引紫簫長不許商音斷客腸聽到月斜纔入破
飛來七十二鴛鴦

王懋明

一首

懋明字僅初長洲人僑居錫山

毛氏樓居即事

爲樓山郭外登眺起幽思片雨沉江暗孤煙上嶺遲鴈

還逢寄字花發滯歸期遠念吳山勝春遊恐後時

姚咨二首

咨字舜咨無錫人有潛坤集

桂亭爲豫章萬隱君賦

南山鬱秋霽重巒桂花白高人愛巖棲躋攀理輕策覽
彼雲木秀悠然縱所適結亭青林端幽賞非矯迹冷風
吹霞裾涼月挂石壁襲芳和天倪餽實駐顏色淮南詎
可招此意良自得願貽瑤華音一慰山中客

西樓席上聽梨園琵琶戲贈

少年文采復風流適意湖山竟日留老去不忘歌舞興
琵琶猶載木蘭舟

明詩綜卷五

四

周詩一首

詩字以言崑山人有虛巖集

皇甫子循云山人詩婉麗以會景俊逸以宣情春容

以達氣真得古人之體

王元美云周以

言如中智比勢雖乏根具

不出小乘語

詩話虛巖類與皇甫昆弟酬和故派亦近之其言云詩之淵妙近體難工而鮮板選體易似而實難侍衣毛嫱借飾西子始勞騁馳終露本來作者既非匠心覽者又皆庸目乃曰甲幾魏晉乙庶齊梁是何古人之多也斯言可鍼危言詩數之膏肓

靈隱寺

靈隱何年寺青山向此開澗流元不斷峰石自飛來竹
覆空王苑花藏大士臺冥探有玄度莫遣夕陽催

唐詩二首

詩字子言無錫人有石東山房彙

九日登牛首山

牛首登高處黃花細雨前山深寒似臘江遠澹於煙寶
刹珠光淨金陵王氣連六龍曾駐輦聽話武皇年

采蓮曲

風微波不起日暮未迴船貪看鴛鴦鳥時時誤采蓮

沈仕一首

任字子登杭州人刑部侍郎銳子自號青門山

王道思云青門樂府古詞雜味遊適之作麗而有則風致焉然邊關
諸詩意氣激發於聲律之外殆雄心俠氣有不能自釋者邪 丘東
伯云青門身本貴介志則清真野服山中江遊海覽新篇雅調遠
適香輶翰墨丹青兼能游藝信手野鶴之在雞羣祥麟之遊郊外

村居春日

柳堰迷丹日蓬扉啓綠煙人間啼鳥外興劇落花前野
色連三徑山光滿四筵鸛鷗如可解堪作酒家錢

用詩餘卷五

五

陸楫一首

楫字思豫上海人承父深蔭入國子監讀書有

蒹葭堂橐

次韻送顧龍山南歸

官河春水送行舟君去匆匆不可留須信故園春正好
莫因風雨駐楊州

牟嘉敏八首

嘉敏字寅定黃巖人有霞溪漫橐

趙方崖云先生以
布衣處窮谷游情

景物能自得師於語言之外
而不越乎尺度矩矱之中

擬古二首

驅車出門關車行復遲遲百州委霜露涼風正淒其天

寒道路艱問君將何之
駕言往宛洛相從遊俠兒遊子
去萬里旋歸竟何時安得附飄風
致此殷勤辭

灌木產崇崗鬱鬱蔽層丘
芳艸依澗側託蔓相綢繆美
人隔遐方宜爲君子仇
未及登君堂歲月倏已道慨彼
芙蓉花燭爛當清秋
采采欲爲贈道路阻且修
願君保明哲妾心亦何尤

遊江心寺登康樂亭子

輕舸截奔浪水國散微陰
沿洄眺孤嶼寶塔凌雙岑
茲遊夙有期始得遂
幽尋淵室接梵語花臺遶龍吟
澗漾元氣中日華映珠林
謝公有遺蹟孤亭俯江浚
曠懷寄玄賞海嶠振徽音
清芬詎可挹高情傾古今
西堂夢不

返池艸春自深

明詩歸卷五十一

六

同方用晦遊西谷

褰裳涉西沚披莽散輕屨
屬稍觀山川異煙火隔墟落
沿洄傍溪曲窈窕入穹壑
幽尋葛可捫暗曖路疑錯
巖雲冒巾幘霏翠灑林薄
汲深俯重淵采秀步崇嶸
坐聆伐木音益感良遇
樂返策復流憩道遙展歡
譔眷茲丘園賞胡爲就羈縛

漁家用從姪存勇韻

茅茨傍江口斷岸依漁梁
榜舟蘆花渚間歌和滄浪
日出水禽散風至蒲帆張
青簑濕不解臥看南山蒼

送馬斗南歸揚州

去年九月黃花秋邂逅與子城南遊高才磊落不易得
竟日尊酒情淹留三年爲客風塵裏末路相逢即知己
禹穴探幽興未窮梁園作賦詞堪擬一別嗟余還故丘
聞君亦欲尋歸舟萍蓬蹤跡本無定使我感慨增離憂
一片孤帆向何處日落雲橫廣陵樹天姥峰前送月明
姑蘇臺畔聽鴻度江煙慘淡江州青衆賓沽酒雙玉瓶
別君惆悵不忍去碧雲回首天冥冥

觀古壁畫山水歌

危樓百尺凌空起古壁丹青畫山水淨掃浮埃據榻觀
筆跡何人乃能爾想當盤礴時巧思妙入神宵中羅萬
象寫出皆天真迴峰疊嶂開嶙峋白波浩蕩渺無垠仙

明詩錄卷五

七

人官闕擁出碧雲裏宛如三山隔水無通津松間白鶴
呼不下却思整鬪凌蒼旻超然風景異人世四時花木
相鮮新溪林冥密碧艸合又如花源有路通秦人蒼茫
遠勢尤莫測渤澥崑崙看咫尺一葉漁舟歸未歸洞庭
秋淨湘煙碧野橋沙岸曲徑通高樹下有長髯翁恍如
著我圖畫中手攜雲鏡倚青松萬籟不起千山空仰天
一嘯看飛鴻

青田溪上

月出高峰潮上灘叮嚀舟子放舟還蒲帆不掛春流急
又過前溪白鷺灣

體文字仲約號寄委江陰學生有友錄彙

劉應谷云寄委

詩應有承襲成一家言

詩話仲約早辟學官肆志詩律築耕舍於郊西有田數十畝力耕而食實至必沽酒酒酣賦詩詩有云得魚便煮酒有酒且留人如此足可謂須復苦貧無魚亦無酒宜主不宜賓如此即高臥何愁不如此是謂達生之士矣平居詩不留草其友花左室見擊手錄之故名友錄彙五言不為舊格所拘頗自超脫是時五岳十岳諸山人率以韋布效縉紳語未免可憎菰蘆中有此人大是不俗

雜詩 三首

林間慈烏烏哺母聲鳴鳴城上雙鳴梟破巢還啄雛
鷹飽食肉勁翻翻平蕪不擊城上鳴但擊林間烏
漢家有通儒窮經三十年腰下鮮尺組囊中無一錢出門逢高車呵者當其前問之彼為誰牧兒新助邊
明鏡不在遠妝臺當目前只言他人媼長謂自己妍
亦不能別鏡亦不能宣遂使效顰子翻希惑者憐

明詩錄卷年

八

三月晦日作

造化如驅車春歸一何早本為天地客又復客中老
榮華已潛奪安得顏色好君看庭下花開者行當掃

宴起

老覺春無賴朝來起最慵烏聲殘夢裏花氣宿醒中
樓日連城下池風過苑通却悲寒食節歲歲客江東

王 璧 一首

璧字宗順泰州安豐場人處士良仲子自號天南逸叟有東崖遺集

詩話東崖隨父心齋之會稽傳陽明良知之學吳興沈桐贈之詩云金子賢者後至理早已融譬彼三世賢指授豈無從詩其餘事然如一室

風過雨三更月到窗好雨應宜早秋花不恨遲坐雨新亭曉聞
潮落月時老攜杖屨歸山谷間看見孫種水田亦有活脫之趣

漫成

青春去何速白髮將奈何豈乏大藥資而不棲巖阿擾
擾苦勞生所得諒無多古人貴聞道道在焉問他

岳岱一首

岱字東伯蘇州衛人有漳餘子集

詩話東伯集交友詩爲今兩
瑤華猶存次山篋中遺意

征南

安南易姓舊相因封賜還應到海濱萬里版圖曾郡邑
殊方小醜亦君臣炎風毒霧煩諸將翠羽明珠入紫宸
想見乞降矜面縛天威此日轉陽春

明詩綜卷五

九

方學漸一首

學漸字達卿桐城人貢生有連理堂集

詩話方氏門才之盛甲於皖口明善先生登瀛其源東南學者推爲職
志焉如東征句云豈謂憑陵越日本至勤師旅出中原宛然空同華野

遺

白雲巖

磴道斜飛瀑巖花半入雲望中孤鳥沒天外一江分竹
柏山樓色旃檀石鼎熏軒然長嘯發清興好誰聞

方學箕一首

學箕字紹卿學漸從弟有卷石山房彙

劉慎吾贈石

怪石從何得玲瓏自可憐感君同白璧置我小窗前

張士淪一首

士淪字心父崑山人有張氏集

送人還京

臨岐一別酒惆悵故人遠落葉雨中滿歸舟江上稀路
將天欲遠帆逐燕同飛去去還鄉樂無勞淚濕衣

陳鳳

三首

鳳字羽伯更字鳴岐無錫人有石邨棗

穆敬甫云山人不務

奇詭而意

象惚然

詩話明詩人同姓名者甚夥然猶世代相去字里未同至金陵陳鳳字羽伯梁谿陳鳳亦字羽伯兩君詩皆平平既無春城寒食之作可別韓

翻始猶兩存終

愁雨湮沒耳

春夜阻舟尤村渡華子攜酒見訪

明詩歸卷五

十

盤谷春雲覆竹扉夜船燈火宿霏微故人何意一尊共
野渡不堪孤鴈飛世路波濤渾不定客程風雨竟誰依
重來應待晴芳好柳絮桃花滿釣磯

宿尤邨渡同李思齊

寒煙蒼蒼溪路昏月出斷岸溪光分孤舟畏險不復渡
兩人對酌皆成醺苦憐白日易華髮所喜青天無片雲
櫂歌漁父杳然去縱橫野水蘆花村

雨中客至

新水柴門漲碧沙孤邨煙樹隱漁家客來湖上偏逢雨
春到江南又見花沽酒隔鄰傳小甕打魚深夜出枯槎
浮生莫遣浮名誤醉裏還驚兩鬢華

朱察卿

四首

察卿字邦憲松江華亭人有朱邦憲集

荆軻

匕首無功壯士醜
函封可惜將軍首
秦廷一死謝田光
社稷何曾計存否
不知秦王環柱時
舞陽在前何所爲
當時太子不早遣
待客俱來事未知

對簿詩

日出雪不消天寒日亦冷
蕭蕭枯楊下危墻
見人影對簿慚
子來公門日延頸
囚服僮僕嗤囊空
吏徒屏懷刑媿君子
惡慝時自省嗟彼羣凶心
持石待下井

雨中感懷

明詩餘卷五

士

春雨久不歇春寒總衣裳
駟馬斷委巷蝸牛蠹空墻
臥讀感舊篇惻惻各悲傷
人生貴適意所就何短長
屠狗足成名拳龍終亦亡
虎韉腐泥沙繭絲成文章
物理有盈虧人情空較量
不如典春衣沽酒澆吾腸

江南

江南千里暗妖氛
野哭家家不可聞
落日羣狐窺白骨
荒林萬馬臥黃雲
將軍不下征夷令
使客空傳祭海文
試問九重宵旰處
殿頭香氣正氤氳

吳

擴
二首

擴字子充崑山人有長吟閣稟貞素堂集

謝茂秦云子充

吐詞新麗
不減唐人

詩話子充游大人以成名嘗於元日賦詩懷分宜閣老其友聞之笑曰
層頭第一日懷中朝第一品官循是懷人即歲除亦輪不到吾輩此可
入啓顏錄嘉靖間山人若呂中甫謝茂秦之徒排難
報恩不無可取若子充所謂斗筭之人無足算也

懷伯兄

老至無家別飄零何處邊音書嘗不定生死竟誰傳
朔鴈驚秋思陰蟲攪夜眠空庭孤月下顧影一潸然

漂母祠

賢哉一飯恩千載猶廟食如何漢諸陵寂寞生荆棘

鄭玄撫一首

玄撫字思祈歛縣人有梧野集

折楊柳

孌孌河堤柳年年送別離攀條不忍折拭淚強相持弱

明詩綜卷五

五

態君應惜柔情妾自知春來愁幾許試看向南枝

汪寬一首

寬字子敬祁門人

鸚鵡

被寵翻遭繫能言太逼真主恩非不厚野性詎能馴去
國長憐爾呼名輒應人江南盛雲木何似隴山春

邵正己一首

正己字格之休寧人有玄石山房州

詩話格之專精
墨務詩亦斐然

銅雀臺

寂寂銅雀望飄飄總帳懸君王遺令日是妾斷腸年舞

影傷羅綺歌聲咽管絃西陵松檟冷日夕鎖寒煙

吳錦一首

錦字有中休寧人有吳有中詩集

送金伯謙北行

浮雲西北征客心渾不住到日屬秋深寒生灞陵樹

吳瑗二首

瑗字子欽歙人

采蓮曲二首

汎汎蘭漿鳴雙雙屬玉起不見采蓮人知在蓮花裏
采得雙蓮蓬中有百蓮子一一自生心外面空相似

吳瓊二首

瓊字邦珍休寧人有紫芝社彙

明詩綜卷五十

三

歲暮書事

海上猶多壘江東未息兵如何觀察使遠報武功成寒
泓凝春令陰霾蔽日明不堪黃浦路雞犬寂無聲

旅邸除夕

老至謀仍拙天寒酒易消冰霜愁裏過鄉國夢中遙一
歲祇今夜百年能幾宵病懷堪自遣無復歎蕭條

葉一清一首

一清字本靜祁門人

王仲房云本靜詩格
稍落而意旨融洽

遣興

頗怪逢迎嬾經旬不出黟州堂一夜雨新漲忽平堤翠

篠吟風細青霞壓樹低滄洲意不淺獨坐領鳧鷖

汪少廉

一首

少廉字古矜休寧人有汪山人集

邊憤

漠南在昔王庭少內地而今戍鼓多何將突營騎白馬
先朝失計割紅螺虛令互市通蕃貢翻遣降王解漢歌
獨喜郭侯曾一戰十年瀚海不揚波

程 柘

一首

柘字來周休寧人有大石山人橐

東原

翠竹孤村合黃花曲逕饒租完無吏過酒熟有鄰招碧

明詩綜卷五

卮

澗當門釣青山隔岸樵自慚非世用長得任逍遙

戴 囀

一首

囀字子京休寧人

得子秀兄避寇消息

問訊東吳使秋來尚避兵一身依短劒數口傍孤城旅
食應無定歸舟未有程此時正愁絕天末斷鴻鳴

程天符

一首

天符字夢甫婺源人

飲酒

昨非未皆非今是未皆是是非皆茫昧寧知譽與毀
于我何悲譽于我何喜時對無極翁儵然鳴綠綺

張應文一首

應文字茂實蘇州嘉定人有巢居小橐

食新米作

人生欲無涯各各饜梁肉吾獨薄滋味一飽但饘粥屏
居事躬耕辛苦踰三伏瀾瀾白露滋粟香稻熟滌我
碌礪場納之杆與柚揚糠已隨風漬水乍離箕欣欣婦
子語足比玉田玉力穡斯有秋薦廟乃嘗穀先民戒肯
播老氏尚實腹感彼桑田巫食新詎非福

張應武

一首

應武字茂仁蘇州嘉定人有文起齋集

郊居雜言

明詩綜卷五十

草

屏居子西郊學圃子躬稼岸峯峯子似山水云云子遠
舍鳥嚶嚶子鳴春草萋萋以迎夏芳菲子及時有美不
來子但謝念我同學子結珮施紳紛車馬子要津蓴魚
懷子未得援鶴怨子無人曷歸來子郊西劃松竹子爲
鄰晨耕子午饁作盛世之逸民

張鑾一首

鑾字顯文萬載人多善行年九十三舉鄉飲大

賓壽百有七歲而卒

百歲作

石田茅屋野人家百番春風換歲華盡道長生綠辟穀
不知香飯有胡麻

范如珪 一首

如珪字文瑞休寧人

江上

江上西風雨復晴菰蒲深處釣絲輕何人隔岸吹長笛
楊柳秋江一夜生

孫良器 一首

良器字貢甫休寧人有九野橐

王仲房云貢甫詩才清思暢言簡意微過姑蘇

一首亂雜在目讀之不覺凄然

過姑蘇有感

東吳城外盡烽煙百姓流移半在船爲問秋風舊來鴈
稻梁今剩幾家田

明詩綜卷五十一

五

鄭孔庶 一首

孔庶字子富歙人

雪後東張碧川

吳橋殘雪漲新痕客舍無人閣酒尊不爲寒梅覓春信
東風長日不開門

葉 杲 一首

杲字杲卿休寧人

旅次江夏

歲暮投南楚蕭然一旅身江山遙對酒鄉里少逢人細
柳舒殘臘疎梅報早春故園歸未得物候倏更新

汪子祐 二首

子祐字受夫祁門人有石西集

吳因次云石西詞博焉昌調清而越

貧病

夜讀朝慵起晨餐午未炊邇來貧亦樂真與病相宜過
受三彭錄游憑二仲隨科頭忘日暮倚杖步雲遲

獨行

日杲秋猶暑林棲鬢欲華獨行銷白晝得意見黃花稻
熟莖莖穗莖肥寸寸芽竹堤香漸近水次有漁家

李
敏一首

敏字功甫休寧人有浮丘山人集

發盤塘

朝發盤塘均夕望平陽郭江空雨冥冥無風客帆落

明詩綜卷五十

七

郭
第一首

第字次甫丹徒人隱於焦山嘗為嵩岱游有廣

篇

何元明云次甫江月不可留山雲坐相失之句駸駸竊盛唐之室

錢塘雨泊

一片迎潮雨錢塘泊岸逢煙明六和塔雲暗兩高峰茶
熟蓬窗火香殘野寺鐘湖頭舊游路濕翠想高松

陸九州
二首

九州字一之無錫人

荆溪

東風靜卷游絲長桃花吹落流水香美人照水芙蓉裳
蘭橈玉腕擊波去欲來不來空斷腸

鍾廣漢云語皆前人已道者而其章法却合唐音

半山

山深翠微寒飛花亂如雨輕風抽布帆落日在高樹

張文介

四首

文介字惟守龍游人有少谷集

湖上晚興

日夕湖水佳波光皎如雪浴堤蹋花去獨行自怡悅浮
香時有無流螢乍明滅興盡擢歸舟山齋照涼月

九日風雨登吳山亭子

今日復九日自憐猶未還巖亭足佳菊風雨亦躋攀漠
漠煙中寺冥冥海上山鄉園渺何處空佇白雲間

遣懷

明詩餘卷五

七

一水斜通棧羣山曲抱城短簷殘雪色遠寺暮鐘聲茅
屋仍加稅天河未洗兵空懷太平策誰問魯狂生

吳江舟中

向夕問舟人吳江將至否須傍微月中繫船好沽酒

王應辰

一首

應辰永嘉人

夜遊曲

燕舞起香塵鶯歌出絳脣直須滅銀燭恐有絕纓人

趙

綱

二首

綱字希大無錫人

黃勉之云希大寄李秀才二十字入唐人詩中未易辨也

黃轟車

楚人拒滎陽漢事日以亟絳灌亦何為相顧徒失色紀
生何雄哉毛骨無所惜黃蘂甘自焚赤龍乃得出如何
垓下平其功竟淪沒

寄雒陽李秀才

未得吳公薦空憐賈誼才年年三月裏相憶看花來

朱陽仲 一首

陽仲以字行失其名遂寧人有青城山人集 李時

遠云文學詩聲調
意境絕類中唐

金溪曲呈方使君

金溪流水發新安一片孤帆兩岸山估客自吹龍女笛

路人遙指玉郎灘

明詩綜卷五

大

余慶 一首

慶字惟德固始人貢士有障風集

送吳隱君南還

可歎論交日翻成餞別時空江憐歲晚遠道念歸遲行

色關鴻雁鄉心挂柳枝殷勤一杯酒相勸復相思

邊習 一首

習字仲學歷城人尚書貢仲子有睡足軒詩集

王昭上云弘正四傑惟何氏之後最大李氏次之徐氏有子伯虬稱詩
吳中名載今兩瑤華而仲子以尚書之貴貧校徒有遺藁一卷薄署

不成兩夕陽開
晚晴其佳句也

雨止

訪舊歸來夕照中天涼雨一溪風須臾雨盡浮雲斂

笑看兒童指蝶螻

禹龍一首

龍字子化揚州興化人

九日登高

佳辰何事恨相仍
萬里高臺醉復登
淮海煙塵迷客路
濠梁烽火照皇陵
牙旗分閭原非將
羽檄徵兵却到僧
遂使英雄增激烈
不堪遲暮欲飛騰

官一夔一首

一夔字舜鳴平度州人官府同知有少泉詩集

九日

獨有幽懷客逢秋
感慨深菊荒三徑
雨荷老半池陰歲

明詩綜卷平

尤

月人間世神仙病後心
北山高興在殊未罷登臨

張墾一首

墾字禹卿南昌人生員有白榆園橐

送仲逸同懋功太守遊滇池

滇南西去在天涯
匹馬先看楚地花
但有故人嚴僕射
杜陵隨處即為家

陸光宙一首

光宙字與嘗平湖人有鉏餘橐

詩話與嘗隱居郊園與宗旭初暘璩之璞君瓊輩一十八人結文酒之社晚夢一道士持陶詩節小像索題諱視之即己也題云在晉爲淵明躬耕鑿五斗昔以節自持今惟義自守千載復歸來春風吹五柳曾識白蓮人遠公是吾友蓋十八人中有白蓮道人如本也翌日復作偈言拔筆而逝卿之遺老至今傳之

歸燕

萬里衡陽雁春來又北征誰憐失羣影故作斷腸聲朔
漠風猶動關山月自明素書吾欲寄須到雒陽城

姚

充二首

充字叔信秀水人有玄岳山人詩集

王伯穀云山人詩清真古澹不

事藻續

興善寺訪威希仲養疴西林禪房限韻

橋分龍藏北水接馬涇西一棹通祇苑孤筇引曲堤梅
同殘雪映竹覆濕雲低不淺陶潛興清尊許共攜

寄懷朱宗魯太醫

憶昔都城醉故人睽攜二十四迴春心隨明月長飛夢

明詩綜卷五

干

目斷停雲欲愴神藏室書成周柱史丹箴筆紀漢宮臣
何時得副還山望芝艸瑯玕共采真

詩話此贈先少保作也少保得御三朝曾撰太醫院志定陵親政後醫或進以金石劑起居未安先入視疾奏曰聖體病在肝腎宜寬平以養氣安靜以益精帝喜命大璫陸

微書之冊斯叔信詩有丹箴句也

戴

乾一首

乾字元泉桐城人嘉靖中處士

述古

英雄一身存安有仇不報覆楚與復楚各不出所料後
此博浪椎報仇志未了進為漢廷傑退借赤松老成功
匪所期封留豈足道

鄭

坤一首

坤宇順卿吳縣人有石南集

俞汝成云順卿詩賦有蕭散清逸之風

同王駕部遊慧山題秋聲小閣

輞川居士共襟期小閣登攀欲暮時
山色可淹今日酒秋聲還憶去年詩
閒雲竹掃無留影老樹藤纏不剩枝
景物慚隨人事謝隔窗幽鳥未曾知

張虞卿一首

虞卿順天人

雜詩

青青江上艸關關洲中禽物類各有待
因時樂相尋嗟予久漂泊感遇情難任
豈無他人好咸非心所欽所思在遠道
關河阻重深寒暑屢變節魚鳥空浮沉
離憂共

明詩繪卷五

主

誰語強坐彈鳴琴孤鸞與別鶴此曲傷人心

王叔承

十四首

叔承初名光循以字行更字承父晚更字子幻

吳江人有吳越遊閩遊楚遊嶽遊諸集

詩話承父才情奔逸下筆不能自休其論詩不甚傾心王李大指謂事與景者天地所自有之物偶遇而收之情與意者吾所本有之物偶觸而發之彼吾役也吾不彼役也斯言良是惜其所作牽率者什九五元美序之稱其句就而色自傳篇就而用恒有餘驟讀之恍然若新既諷之而又恍然若故王敬美序之稱其能以牛溲馬勃為藥何嗚笑怒罵為文章蓋皆寫賅于褒之辭而承父自負其才受二美之籠絡不覺也平情而論承父亦安能敵元美即就宮詞百首而觀已遠出元美之下特其卷帙繁富不減弇州詩部爾當嘉隆間布衣稱詩若沈嘉則工伯穀及承父三人咸以多勝人今歷年未久全集流傳日寡後世誰相知為重刊其詩者豈惟重刊覽其全集而不欠仲思歟者亦稀矣奚以多為

將渡江訪戚世秀阻風雲陽道中作

大江何茫茫晨風颺已夕故人如浮雲可望不可即有
夢亦須臾寤言轉悽惻生別時易徂一日三秋隔袖中
懷素書零落餘紙墨區區方寸心相看皎猶昔

自桐廬入七里瀧出嚴州舟中懷古

入瀧還出瀧宛轉千盤經旣登桐君廬復憩嚴子亭水
光鴨頭綠山色蛾眉青雲中雞犬隔天際鸞鶴停往往
至人宅選勝開巖垆舊壇秘光彩遺廟虛精靈朱鳥不
可見哀歌許誰聽

題陳從訓所藏惠崇溪山春霽圖卷

惠崇一詩僧宋首柴周尾丹青入禪觀別自通玄理能
於尺素間點染千山水昨登金焦興不孤陳郎示我溪

明詩綜卷五

主

山圖画家精工多近俗寫意得神形不足此僧妙趣種
種兼不滿三尺吳興繖針頭毫末密相接有如螭螟寄
蚊睫或言工勝趙大年又云妙超展子虔只須三日坐
其下一花一草生意全乃知陳郎揮灑信有本恥與當
今画家混我歌長句君莫嗤惠崇惠崇郎所師

水北菴醉歸書興

水深肥紫蟹稻熟美黃雞溪饌秋來賤酒人閑處齊醉
歸廬嶽社惱殺太常妻點檢明朝約野橋煙樹西

屯溪乘竹筏抵紋溪作

綠竹揚輕筏屯溪渡早暉魚梁羣鷺下石碓亂泉飛小
市環青麓長橋跨翠微前峰仙路近樹色滿秋衣

金陵豔曲

綠江天作塹翠嶺石爲城柳暗黃金塢花明白玉京春
風十萬戶戶戶有啼鶯

揚州歌 二首

二十四橋邊當壚最可憐妝成窺客坐不耐數青錢
東家女十三西家女十五夜半賽娘啼嫁與并州估
益卿簡寄家兄酒錢志感

異姓憐兄弟天涯寄酒錢急難那得汝我媿鶴鴿篇
觀音巖訊蘇道人適山頭虎過

西湖雜興

層巖飛茗煙道人正高坐牧童折山花笑指神虎過

明詩餘卷五

五

看花須近寒食看潮待過中秋二月十五花信八月十
八潮頭

荆溪雜曲 二首

賣殘竹菌筍還來收罷蘭花蕙又開但焙茶芽先穀雨
不愁虎跡遍莓苔

蜀山山下火開窑青竹生煙翠石銷笑問山娃燒酒杓
砂坯可得似柳瓢

竹枝詞

白鹽出井火燒畬女子行商男作家檣布紅衫來換米
滿頭都插杜鵑花

黃姬水 一首

姬水字淳父長洲人省曾子有白下高素二集

王元美云黃淳父如比里名姬作
酒劍才色既自可觀時出俊語

送汪太學遊江都

千里王孫歸未能風雲意氣每超騰
年來裘馬遨遊處不是金陵即廣陵

王穉登十二首

穉登字百穀一字伯固長洲人國子監生有晉

陵金昌燕市客越青雀竹箭梅花什荆溪松壇

諸集

詩話伯穀詩亦華整第纏肉勝於骨至袁文榮所賞色借相公袍上紫
書生薄命原同妾等句媚寵之詞近於卑田乞兒語矣虞山錢氏頸錄
太穉字剛其什九而風骨始刻
露膏鼎一鬻未爲不知味也

明詩綜卷五十

五

送吳郎遊金陵

兩地三春別孤帆千里愁君今遊帝里誰與共仙舟
夜雨連瓜步春潮滿石頭長于管絃地走馬莫淹留

送慧師還五井兼懷其故師楊伯翼

持鉢南歸去長天接遠汀未霜吳樹赤過雨越山青
帆外桃花渡函中貝葉經還將二泉水一酌子雲亭

婁東訪顧靖甫

訪爾山城下秋風一徑偏溪魚名箭鏃野菊類金錢
州廢歸吳宅潮通入楚船馬鞍峰頂石把酒憶當年

看梅過玄墓山中

橋外花開日分明雪作圖不將他樹雜未有一家無多

處半青嶂香時過太湖濁醪元易得市遠亦須沽

送吳中丞之金陵

建業青山是帝都
雙勞開府握軍符
花間朱鷺鏡歌曲
江上黃龍水陣圖
玉節中丞新盪寇
樓船諸將舊平吳
不知燕子磯前地
容得陳琳艸檄無

邊警

琵琶洲上香山澳
來往初通海上檣
漸習文書通漢語
別居城郭慕中華
餘甘却戴西商船
吉貝先歸市令家
島寇須防勾引漸
斧柯莫待翦萌芽

長安春雪曲

春風吹雪下桑乾
添得城中一夜寒
鳩鵲樓高消不盡

明詩綜卷五

五

長安街上馬頭看

都下寒食

騎馬尋春春尚遲
東風空自向人吹
燕王城裏千株柳
寒食來看未有絲

望湖亭

亭邊楊柳水邊花
落日行人正憶家
不及江南湖上寺
木蘭舟小載琵琶

湖上梅花歌

二首

山煙山雨白氤氳
梅蕊梅花濕不分
渾似高樓吹笛罷
半隨流水半爲雲

虎山橋外水如煙
雨暗湖昏不繫船
此地人家無玉曆

梅花開日是新年

清明前一日慈雲菴訪怡菴上人

春風駘蕩日初晴與客尋僧入化城
牆裏杏花牆外柳始知佳節近清明

梁辰魚

二首

辰魚字伯龍崑山人有遠遊藁

詩話伯龍雅擅詞曲所撰江東白苧妙絕時人時邑人魏良輔能喉轉音聲始變弋陽海鹽故調爲崑腔伯龍填沈妙記付之王元美詩所云吳閩白面冶游兒爭唱梁郎雪豔詞是已同時又有陸九疇鄭思笠包郎郎戴梅川輩更唱迭和清詞豔曲流播人間今已百年傳奇家曲別本弋陽子弟可以改調歌之惟沈妙不能回

是詞家老手詩律猶未細猶能駢踣而已

登西塞山訪張志和遺跡

晚登西塞山翛然出林薄諸峰自南來
茲嶺獨崖孽攀

明詩綜卷五

五

援上蘿磴翠微構蘭若清梵懸香林
法鼓時間作零雨飄巖阿殘雲臥松閣
緬懷玄真子雅志甘寂寞雲鴻入冥冥孤飛避繒繳風雨湖上歸浮名寄策筓
斯人邈千載高風滿寥廓伊余慕肥遯世故還束縛
名境雖盤桓猶未諧宿諾何時返初服於焉此棲託

夏日泛舟荆溪暮宿湖口

五月荆溪上驚湍走白沙風檣敲聽燕浪機遠衝花
山勢通吳直溪流向月斜維舟見漁火深樹有人家

秦嘉禾

二首

嘉禾字吾田桐城處士自號大龍山人有彭澤

藁

小孤山

砥柱從開闢中流自古今神龍常在窟怪木不成林絕頂雲流影懸崖鳥過音吾題百丈壁仙跡倘相尋

汎湖

汎汎楓湖十里中薄雲細浪夜初融月明會聽雙龍起我欲騎之到海東

汪坦一首

坦字仲安鄞縣人國子監生有石孟集

夜上嚴灘

上灘似牽羊下灘如走馬灘高月未出亂石怒流瀉離離巖際星風雨聲在下夜久漁火明疑是披裘者

明詩綜卷五

三

林兆恩一首

兆恩字谷子莆田人

詩話林谷子李卓吾閩中二異端也

題室

茫茫天地一間身寄跡榕州今幾春日暮潮平沙欲合隔江還有未歸人

徐韋二首

韋字明佩江陰人國子監生有觀夢菴集

重經故居

荒臺歎側柳凋零故里重過悵獨行燕子不來花落盡夕陽偏傍斷橋明

過復元從孫

銀蠟風多護錦屏飛觥不逐舞腰停當筵莫唱江南曲
白髮周郎已倦聽

董宜陽一首

宜陽字子元自號紫岡山樵上海諸生

初發谷陽夜泊追懷舊游寄袁魯望

不寐嫌宵永殘星帶月明城烏喧夜柝岸葉亂秋聲世
路悲今昔存亡念友生淒涼感舊賦轉見古人情

汪淮一首

淮字禹乂休寧人有蘿山詩藁

聞報懷族孫時元

明詩綜卷五

天

聞道東南寇烽煙處處昏倉皇悲客子流落向江邨野
曠雲迎陣人稀晝掩門更誰如漂母一飯識王孫

沈倬五首

倬字道章吳江諸生以子琦琬珣貴累贈通奉
大夫有紀志藁

松際月

清風湖上來徐徐入松下風吹松子落拾之欲盈把月
出松際雲清光瀉籬舍

題張師清望樓

曉色臨平野高樓屬斷雲連峰當戶入一水傍階分樹
影參差動禽聲下上聞主人方擁傳莫草北山文

送別

空城積雨煙霧深
驛亭迢遞江沉沉
桃花一樹感春淚
楊柳萬條驚別心
燕趙古來多結客
秦淮道上誰知音
丈夫意氣偶相得
脫贈豈惜雙南金

月夜

明月吐夜光
寒影在溪水
山人抱琴來
坐久秋雲起

花溪客舍

孤燈坐來昏
淒其不成宿
夜鶴忽驚栖
翻飛入修竹

卓明卿一首

明卿字徵甫
仁和人以太學生選授光祿寺署

丞有集

葉茂長云徵甫詩華
膽和暢才調過人

明詩錄卷五

无

江上別黎惟敬

執手河橋上
遙天起片雲
仙帆千里發
客路一江分
桂嶺先秋色
樟亭半夕曛
家山到何日
兩地惜離羣

陳九州一首

九州字維同
江陰縣學生

夜泊荆溪

細柳湖邊岸
青蒲水上舟
星隨孤月動
山入暝煙收
鼓柁聞漁浦
懸燈見佛樓
客途春欲盡
歸思滿滄洲

王逢年一首

逢年字舜華
初名治字明佐
崑山人同祖之子

諸生有海岱集

王元美云明佐錄
麗宏博纒纒不竭

秋曉聞鴈

北斗橫天秋夜闌，翔雲遙度鴈聲寒。夢回旅館燈初落，書寄衡陽葉未殘。隱隱斷行迷極浦，蒼蒼斜月帶長安。湘南塞北關情遠，人倚青樓幾處看。

汪時元 一首

時元字惟一休寧人

九日舟中

秋風葉正飛，江上逢重九。人世幾登高，寂寞黃花酒。

周青

士云詩有不必深言而選家必錄者此作是也

袁景休 三首

景休字孟逸吳縣人

明詩卷卷五

三

詩話孟逸隱於卜肆後閩人林古度寓淡水寺見孟逸夫婦停棺于寺傷其無子取摺疊扇兩柄貯破屋中上雨旁風極悽慘之狀題詩其上有新安客見而憫之出私錢庇窆於古度又口授遺詩刻之成集余購之不得續谷蔣氏藏孟遠墨蹟五翻凡十絕句丞錄三首孟逸風見知於沈嘉則其送嘉則詩云道上霜寒連白鴈馬頭木落見黃河殊有爽氣宜其詠笑誠誼及劉子威侍御也

入慧慶寺

新秋入古寺，涼氣何清越。樹杪夕陽微，山蟬鳴不歇。

春日過南城

黃鳥當三月，城南景正繁。桃花千萬樹，不異武陵源。

自江村望虎丘

茲山奇且麗，迥與江村合。幽人去復來，斜陽在孤塔。

王受甫 一首

不知何許人，詩載袁中道游居錄


題九山壁

一心貪與白雲期解帶歸來任所之每過名山經月住

蘇門山上更多時

袁小修云九山去輝縣十里上有斧劈石石上題詩後云嘉靖癸卯受甫不知何人

明詩綜卷五十



◎ 杭州圖書館

杭州圖書館